

四庫全書

經部

欽定四庫全書

孟子纂疏卷四

宋 趙順孫 撰

朱子集註

公孫丑章句下

凡十四章自第二章以下記孟子出處行實為  
詳

孟子曰天時不如地利地利不如人和

天時謂時日支干孤虛王相之屬也

語錄曰孤虛以  
方位言如俗言

向某方利某方不利之類王相指日時。輔氏曰時十二時也日十日也支十二支也干十干也孤虛星也王相五氣之盛衰也其法具於兵書所由來者遠矣。蔡氏曰時四時也日日辰也史記註六甲孤虛法甲子旬戌亥為孤辰己為虛甲戌旬申酉為孤寅卯為虛甲申旬午未為孤子丑為虛甲午旬辰巳為孤戌亥為虛甲辰旬寅卯為孤申酉為虛甲寅旬子丑為孤午未為虛王相如東方木王相於卯之類。愚謂孤虛之法以一畫為孤無畫為虛二畫為實以六十甲子日定東西南北四方然後知其孤虛實而向背之即地利險阻城池之固也人和得民心之和也知吉凶矣

三里之城七里之郭環而攻之而不勝夫環而攻之必

有得天時者矣然而不勝者是天時不如地利也

扶夫音

三里七里城郭之小者郭外城環圍也言四面攻圍  
曠日持久必有值天時之善者

城非不高也池非不深也兵革非不堅利也米粟非不  
多也委而去之是地利不如人和也

革甲也

愚謂古者之甲以革為之故曰人為攻皮之工後世始用金曰鎧

粟穀也委

棄也言不得民心民不為守也

故曰域民不以封疆之界固國不以山谿之險威天下



不以兵革之利得道者多助失道者寡助寡助之至親戚畔之多助之至天下順之

域界限也

以天下之所順攻親戚之所畔故君子有不戰戰必勝矣

言不戰則已戰則必勝

輔氏曰此帝王常勝之道而夫子所謂我戰必克者皆為

是也。尹氏曰言得天下者凡以得民心而已

。孟子將朝王王使人來曰寡人如就見者也有寒疾

不可以風朝將視朝不識可使寡人得見乎對曰不幸

而有疾不能造朝

章內朝音潮唯朝將之朝如字造七到反下同

王齊王也孟子本將朝王王不知而託疾以召孟子

故孟子亦以疾辭也

或問孟子本欲朝王矣王召之則辭而不往何也曰孟子於齊

實處賓師之位而未嘗受祿蓋非齊王之所得臣也其相見之節王就而見孟子則可孟子自往而見王則不可王而召之則既失禮矣而其託疾者又不誠也則若之何而可往哉○語錄曰問莫是以齊王不合託疾否曰未論齊王託疾看孟子之意只說他不合來召蓋在他國時諸侯無越境之理只得以幣來聘故賢者受其幣而往見之所謂答禮行義是也如見梁惠王是惠王先來聘之既至其國或為賓師有

事則王自來見或自往見王但召之則不可召之則有自尊之意故不往見也答陳代如不待其招而往何哉此以往他國而言答萬章天子不召師而況諸侯乎此以在其國而言。輔氏曰孟子本將朝王者禮也王不知而託疾以召孟子故孟子亦以疾辭者義也於此可見孟子之心至公無私因事制宜如權衡然物有重輕則權亦從而前卻也

明日出吊於東郭氏公孫丑曰昔者辭以病今日弔或者不可乎曰昔者疾今日愈如之何不弔

東郭氏齊大夫家也昔者昨日也或者疑辭辭疾而出弔與孔子不見孺悲取瑟而歌同意

輔氏曰孔子以疾辭孺悲

而不出見然又取瑟而歌使之知其非疾所以警教孺悲也孟子以疾辭齊王而不往朝然又出弔東郭而使之知其非疾者亦所以警教齊王也此皆聖賢至誠應物而得乎時中之義也

王使人問疾醫來孟仲子對曰昔者有王命有采薪之憂不能造朝今病小愈趨造於朝我不識能至否乎使數人要於路曰請必無歸而造於朝

要平聲

孟仲子趙氏以為孟子之從昆弟學於孟子者也采薪之憂言病不能采薪謙辭也仲子權辭以對又使人要孟子令勿歸而造朝以實己言

輔氏曰仲子雖學於孟子然未

免於世俗之習懾於勢之尊而不知在己之有義眩於儀之多而不察其意之不誠故作此態是亦世俗之常情也

不得已而之景丑氏宿焉景子曰內則父子外則君臣人之大倫也父子主恩君臣主敬丑見王之敬子也未見所以敬王也曰惡是何言也齊人無以仁義與王言者豈以仁義為不美也其心曰是何足與言仁義也云爾則不敬莫大乎是我非堯舜之道不敢以陳於王前故齊人莫如我敬王也

惡平聲下同

景丑氏齊大夫家也景子景丑也惡歎辭也景丑所

言敬之小者也孟子所言敬之大者也

輔氏曰景丑之說擊踞曲

拳奔走承順之敬世俗之所知故曰敬之小孟子所言陳善閉邪責難於君之敬聖賢之所行故曰敬之大也。真氏曰景子但知聞命奔走為敬其君不知以堯舜之道告其君者乃敬之大者也僕隸之臣唯唯承命外若敬其君然心實薄之曰是何足與言仁義此不敬之大者也齊人之敬君以貌孟子之敬君以心

景子曰否非此之謂也禮曰父名無諱君命名不俟駕

固將朝也聞王命而遂不果宜與夫禮若不相似然

夫音

扶下  
同

禮曰父命呼唯而不諾又曰君命召在官不俟屨在外不俟車言孟子本欲朝王而聞命中止似與此禮之意不同也

曰豈謂是與曾子曰晉楚之富不可及也彼以其富我以吾仁彼以其爵我以吾義吾何慊乎哉夫豈不義而曾子言之是或一道也天下有達尊三爵一齒一德一朝廷莫如爵鄉黨莫如齒輔世長民莫如德惡得有其

一以慢其二哉

與平聲懽口  
簾反長上聲

懽恨也少也或作懽字書以為口銜物也然則懽亦但為心有所銜之義其為快為足為恨為少則因其

事而所銜有不同耳

大學或問曰孟子所謂懽於心  
樂毅所謂懽於志則以銜其快

與足之意而言者也孟子所謂吾何懽漢書所謂懽粟姬則以銜其恨與少之意而言者也讀者各隨所指而觀之則並孟子言我之意非如景子之所言者行而不悖矣

因引曾子之言而云夫此豈是不義而曾子肯以為

言是或別有一種道理也

輔氏曰道雖一本而其用  
則有萬不同時異勢殊則



聖人處之各自成一樣禮經之說固是正達通也蓋理然曾子之說又或別是一般道理也

通天下之所尊有此三者曾子之說蓋以德言之也輔氏曰自天下有達尊三以下則是孟子自說而集註所謂曾子之說蓋以德言者特指吾仁吾義云耳今齊王但有爵耳安得以此慢於齒德乎

故將大有為之君必有所不召之臣欲有謀焉則就之其尊德樂道不如是不足與有為也

樂音洛

大有為之君大有作為非常之君也程子曰古之人所以必待人君致敬盡禮而後往者非欲自為尊大

也為是故耳

輔氏曰以為欲自尊大者世俗之見也  
不足與有為者君子之心也君子之所

為衆人固不識

者正謂此也

故湯之於伊尹學焉而後臣之故不勞而王桓公之於  
管仲學焉而後臣之故不勞而霸

先從受學師之也後以為臣任之也

今天下地醜德齊莫能相尚無他好臣其所教而不好

臣其所受教

好去聲

醜類也尚過也所教謂聽從於己可役使者也所受

教謂己之所從學者也

湯之於伊尹桓公之於管仲則不敢召管仲且猶不可召而況不為管仲者乎

不為管仲孟子自謂也

輔氏曰孟子到此不得已而直言之不如是則公孫丑之

徒終不足以知此義也

范氏曰孟子之於齊處賓師之位非當

仕有官職者故其言如此

語錄曰問賓師如何曰當時有所謂客卿者是也大

槩尊禮之而不居職任事

○此章見賓師不以趨走承順為恭而

以責難陳善為敬人君不以崇高富貴為重而以貴

德尊士為賢則上下交而德業成矣

輔氏曰天地交而後萬物遂上

下文而後德業成此自然之理也世衰道微君不能止於仁而惟知恃勢以驕夫臣臣不能止於敬而惟知自屈以諂夫君上下之情扞格而不接德之與業渙散而無成天下日趨於大亂極敗而世俗猶以孟子為迂濶於事亦可悲矣

○陳臻問曰前日於齊王餽兼金一百而不受於宋餽七十鎰而受於薛餽五十鎰而受前日之不受是則今日之受非也今日之受是則前日之不受非也夫子必居一於此矣

陳臻孟子弟子兼金好金也其價無倍於常者一百  
百鎰也

孟子曰皆是也

皆適於義也

輔氏曰以事言則或受或不受固不一  
也以義言則受者義所當受也不受者  
義所不當受也故曰皆適於義也陳臻  
只就事上較量孟子則以義為斷制也

當在宋也予將有遠行行者必以贐辭曰餽贐予何為

不受

贐除  
刃反

贐送行者之禮也

當在薛也予有戒心辭曰聞戒故為兵餽之予何為不

受為兵之  
為去聲

時人有欲害孟子者孟子設兵以戒備之薛君以金  
餽孟子為兵備辭曰聞子之有戒心也

若於齊則未有處也無處而餽之是貨之也焉有君子

而可以貨取乎

焉於  
虔反

無遠行戒心之事是未有所處也取猶致也○尹氏

曰言君子之辭受取予唯當於理而已

輔氏曰理體  
也義用也當

於理則是適於義也。○問孟子但有辭有受有取初無予之事而尹氏併言辭受取予者何也曰學者玩此章非特可以知辭受之義而亦可以知所予矣

○孟子之平陸謂其大夫曰子之持戟之士一日而三失伍則去之否乎曰不待三去上聲

平陸齊下邑也大夫邑宰也戟有枝兵也士戰士也  
五行列也去之殺之也

然則子之失伍也亦多矣凶年饑歲子之民老羸轉於溝壑壯者散而之四方者幾千人矣曰此非距心之所

得為也

幾上聲

子之失伍言其失職猶士之失伍也距心大夫名對言此乃王之失政使然非我所得專為也

曰今有受人之牛羊而為之牧之者則必為之求牧與芻矣求牧與芻而不得則反諸其人乎抑亦立而視其死與曰此則距心之罪也

為去聲死與之與平聲

牧之養之也牧牧地也芻草也孟子言若不得自專何不致其事而去



他日見於王曰王之為都者臣知五人焉知其罪者惟孔距心為王誦之王曰此則寡人之罪也

見音現為王之為去聲

為都治邑也邑有先君之廟曰都

語錄曰古之王者嘗為都處便自有

廟如大王廟在岐文王廟在豐武王祭大王則於岐祭文王則於豐鎬京却無二王之廟又如晉獻公使申生祭於曲沃武公雖自曲沃入晉而其先君之廟則乃在曲沃而不徙孔大夫姓也為

王誦其語欲以風曉王也。陳氏曰孟子一言而齊之君臣舉知其罪固足以興邦矣然而齊卒不得為善國者豈非說而不繹從而不改故邪

陳氏名暘三山人。輔氏

曰孟子一言而齊之君臣舉知其罪者理明辭達長於譬喻而能感發於人故也然齊之君臣雖知其罪而終不能改繹者志小氣輕志小則易足蓋元不曾有大底規模氣輕則多率多率則凡事說過便休都無那自訟自責之意如此則何緣會改

○孟子謂蚺鼃曰子之辭靈丘而請士師似也為其可以言也今既數月矣未可以言與

蚺音遲鼃烏花反為去聲與平聲

蚺鼃齊大夫也靈丘齊下邑似也言所為近似有理可以言謂士師近王得以諫刑罰之不中者

蚺鼃諫於王而不用致為臣而去

致猶還也

齊人曰所以為蜺鼃則善矣所以自為則吾不知也為去聲

譏孟子道不行而不能去也

公都子以告

公都子孟子弟子也

曰吾聞之也有官守者不得其職則去有言責者不得其言則去我無官守我無言責也則吾進退豈不綽綽

然有餘裕哉

官守以官為守者言責以言為責者綽綽寬貌裕寬意也孟子居賓師之位未嘗受祿故其進退之際寬

裕如此

輔氏曰在易晉之初六曰罔孚裕無咎程子曰夫子恐後人不達寬裕之意居位者廢職

失守以為裕故特云初六裕則無咎者始進未受命當職任故也若有官守不信於上而失其職一日不可居也由是觀之凡始進未受命者苟上未見信猶可以寬裕自守況孟子處賓師之位又未嘗受祿乎宜其進退寬裕如此也一有官守言責則當自盡其職不可如此矣蚺鼃是有言責者孔距心是有官守者蚺鼃聞孟子之言雖不自以為罪然遂諫於王而不用致為臣而去孔距心雖知其為罪却只說過了

便休盡之資質賢於距心多矣學者須尹氏曰進退當學蜚盡則改過勇而進德當日新也

以速當於理而已

輔氏曰尹氏之說與上章君子之辭受取予唯當於理而已同意言

孟子之辭受取予進退久速雖有不同然非有所愛憎適莫於其間也一當乎天理而已矣玩味其言可發深省嘗謂聖賢之曉人常寬裕委曲而無迫切之意人見其如此也則曰聖賢之術也而不知聖賢初無心也理當然耳故其所為無迹後世妄意聖人之所為而挾術以諫君故其迹露如魏徵望獻陵之事可見雖能濟一時之事然懷是心以事君則不恭甚矣

○孟子為卿於齊出弔於滕王使蓋大夫王驪為輔行

王驪朝暮見反齊滕之路未嘗與之言行事也

蓋古蓋反見音

現

蓋齊下邑也王驪王嬖臣也輔行副使也反往而還

也行事使事也

輔氏曰使事謂弔祭之禮邦交之儀凡禮文制數皆是也

公孫丑曰齊卿之位不為小矣齊滕之路不為近矣反

之而未嘗與言行事何也曰夫既或治之予何言哉

夫音

扶

王驪蓋攝卿以行故曰齊卿夫既或治之言有司已

治之矣孟子之待小人不惡而嚴如此

輔氏曰夫既或治之正答

公孫丑未嘗與之言行事一句也孟子言所謂使事有司既已治之而得其宜矣自不須更與王驩言也只此句便見孟子之待小人不惡而嚴之意使有司不能治其事於禮儀制數有曠闕不齊整處而孟子固不與驩言而正之則非所謂不惡矣今有司既已能治辦其事而猶與之言則便有徇之之意而不可謂之嚴矣然自常情觀之則孟子之不與驩言不以為惡之而不欲與之言則以為易之而不足與之言矣夫惡之而不欲與之言則隘易之而不足與之言則忽隘與忽孟子無是心也但言有司既已能治辦其事而不與之言則亦是順理之事而其中自有不惡而嚴之意耳故愚嘗謂君子之待小人有正己而無屈意有容德而無過禮惡惡之心雖不能無然亦不為已甚之疾也

○孟子自齊葬於魯反於齊止於贏充虞請曰前日不

知虞之不肖使虞敦匠事嚴虞不敢請今願竊有請也  
木若以美然

孟子仕於齊喪母歸葬於魯嬴齊南邑充虞孟子弟  
子嘗董治作棺之事者也嚴急也木棺木也以已通  
以美太美也

曰古者棺槨無度中古棺七寸槨稱之自天子達於庶  
人非直為觀美也然後盡於人心

稱去聲

度厚薄尺寸也中古周公制禮時也

輔氏曰古者棺槨無度者想只



是過於厚觀十三卦喪葬取之大過可樽稱之與棺見至周公制禮時始為七寸之制也

相稱也

輔氏曰謂棺七寸則樽亦七寸

欲其堅厚久遠非特為人觀

視之美而已

輔氏曰人子之喪親所以為之棺樽者蓋欲其堅厚以歷久遠而已非是欲為

人觀視之美也蓋必如此然後於人心為盡耳盡於人心此一句須當自體之若後世之厚葬却只是欲為人觀美之故也

不得不可以為悅無財不可以為悅得之為有財古之人皆用之吾何為獨不然

不得謂法制所不當得之為有財言得之而又為

有財也或曰為當作而

輔氏曰先儒多以七寸之棺自天子達於庶人與下文得

之為有財兩句礙故解云所以不得者正謂無財之故耳集註不從者此蓋孟子因而泛說葬禮如重累之數牆翬之飾既有定制則不可得以為悅非獨指棺槨言之也蓋孟子自做兩句分說下來得之為有財又是總說必竟是兩意或者又以為當作而則尤分曉為作而是字誤也

且比化者無使土親膚於人心獨無忤乎

比必二反忤音效

比猶為也化者死者也忤快也言為死者不使土近

其肌膚於人子之心豈不快然無所恨乎

輔氏曰謂厚其棺槨

者正為死者不欲使土近其肌膚耳惟如此則人子之心始以為快而無所慊恨也有所恨則是有所不

快處則是其  
心有不盡也

吾聞之也君子不以天下儉其親

送終之禮所當得為而不自盡是為天下愛惜此物

而薄於吾親也

輔氏曰如此則便是倒行逆施不順理底於所厚者薄則無所不薄矣墨

子之葬以薄為  
道者即是此意

○沈同以其私問曰燕可伐與孟子曰可子噲不得與人燕子之不得受燕於子噲有仕於此而子悅之不告於王而私與之吾子之祿爵夫士也亦無王命而私受

之於子則可乎何以異於是

伐與之與平聲下伐與殺與同夫音扶

沈同齊臣以私問非王命也

輔氏曰沈同問燕可伐否耳固不問以齊伐燕

為如何也若是以王命來問孟子必當詳告之不但曰可而已也

子噲子之事見前

篇諸侯土地人民受之天子傳之先君私以與人則

與者受者皆有罪也

輔氏曰此謂不由其道妄取妄予如子噲子之之徒者由其道

則三聖之授受乃先天而天弗違之事不可以罪言矣

仕為官也士即從仕之

人也

齊人伐燕或問曰勸齊伐燕有諸曰未也沈同問燕可

伐與吾應之曰可彼然而伐之也彼如曰孰可以伐之則將應之曰為天吏則可以伐之今有殺人者或問之曰人可殺與則將應之曰可彼如曰孰可以殺之則將應之曰為士師則可以殺之今以燕伐燕何為勸之哉天吏解見上篇言齊無道與燕無異如以燕伐燕也

史記亦謂孟子勸齊伐燕蓋傳聞此說之誤

語錄曰孟子居

齊許以伐燕之事必親見之齊王乃無一語謀於孟子而孟子亦無一語諫之何也想得孟子亦必以伐之為是但不意齊師之暴虐耳不然齊有一大事如此而齊王不相謀孟子豈可更居齊邪史記云鄒人

孟軻勸齊王伐燕云此湯武之舉也想承此誤然亦有不可曉者。又曰孟子言伐燕有四須合而觀之燕之父子君臣如此固有可伐之理然孟子不魯教齊不伐亦不魯教齊必伐但曰為天吏則可以伐之。○楊氏曰燕固可伐矣故孟子曰可使齊王能誅其君弔其民何不可之有乃殺其父兄虜其子弟而後燕人畔之乃以是歸咎孟子之言則誤矣

○燕人畔王曰吾甚慙於孟子

齊破燕後二年燕人共立太子平為王

陳賈曰王無患焉王自以為與周公孰仁且智王曰惡

是何言也曰周公使管叔監殷管叔以殷畔知而使之是不仁也不知而使之是不智也仁智周公未之盡也而況於王乎賈請見而解之

惡監皆平聲

陳賈齊大夫也管叔名鮮武王弟周公兄也武王勝商殺紂立紂子武庚而使管叔與弟蔡叔霍叔監其國武王崩成王幼周公攝政管叔與武庚畔周公討而誅之

蔡氏曰周公攝政管叔於周公為兄尤所覬覦故流言公將不利於孺子周公避位居東

後成王悟迎周公歸叔懼遂與武庚叛成王命周公征討而誅戮之

見孟子問曰周公何人也曰古聖人也曰使管叔監殷  
管叔以殷畔也有諸曰然曰周公知其將畔而使之與  
曰不知也然則聖人且有過與曰周公弟也管叔兄也  
周公之過不亦宜乎

與平聲

言周公乃管叔之弟管叔乃周公之兄然則周公不  
知管叔之將畔而使之其過有所不免矣

語錄曰周公當初也

看那兄弟不過本是怕武庚叛故遣管蔡霍叔去監  
他為其至親可恃不知他反去與那武庚同作一黨  
○輔氏曰周公以親之故不忍料其兄之惡而使之  
故不免有過是以孟子亦以為周公之過不亦宜乎



不說周公  
為無過也

或曰周公之處管叔不如舜之處象何也

游氏曰象之惡已著而其志不過富貴而已故舜得  
以是而全之若管叔之惡則未著而其志其才皆非  
象比也周公詎忍逆探其兄之惡而棄之邪周公愛  
兄宜無不盡者管叔之事聖人之不幸也舜誠信而  
喜象周公誠信而任管叔此天理人倫之至其用心  
一也輔氏曰此是集註採程子游氏兩說合而成之  
可謂曲盡人情矣舜與周公皆是處聖人之不  
幸使其易地而處則皆然也此  
乃是以天理處人倫之極至處

且古之君子過則改之今之君子過則順之古之君子其過也如日月之食民皆見之及其更也民皆仰之今之君子豈徒順之又從為之辭

更平聲

順猶遂也更改也辭辯也更之則無損於明故民仰之順而為之辭則其過愈深矣責賈不能勉其君以遷善改過而教之以遂非文過也。林氏曰齊王慙於孟子蓋羞惡之心有不能自已者使其臣有能因是心而將順之則義不可勝用矣而陳賈鄙夫方且

為之曲為辯說而沮其遷善改過之心長其飾非拒諫之惡故孟子深責之然此書記事散出而無先後之次故其說必參考而後通若以第二篇十章十一章置於前章之後此章之前則孟子之意不待論說而自明矣

輔氏曰林氏說得齊王之心發處與陳賈之意邪處孟子責陳賈之言深切處皆甚分明有以啓發萬世之為君臣者有能因是心而將順之者則如孟子因齊王見牛不忍之心而引之使保民者是也

○孟子致為臣而歸

孟子久於齊而道不行故去也

王就見孟子曰前日願見而不可得侍同朝甚喜今又棄寡人而歸不識可以繼此而得見乎對曰不敢請

耳固所願也

潮音

他日王謂時子曰我欲中國而授孟

子室養弟子以萬鍾使諸大夫國人皆有所矜式子盍

為我言之

為去聲

時子齊臣也中國當國之中也萬鍾穀祿之數也鍾

量名受六斛四斗

愚案四豆為區區受斗六升四區為釜釜受六斗四升十釜為鍾受

六斛  
四斗矜敬也式法也盍何不也

時子因陳子而以告孟子陳子以時子之言告孟子

陳子即陳臻也

孟子曰然夫時子惡知其不可也如使予欲富辭十萬

而受萬是為欲富乎

夫音扶  
惡平聲

孟子既以道不行而去則其義不可以復留而時子

不知則又有難顯言者

輔氏曰顯言之則許揚齊王之失而有戾於我固所願之

言

故但言設使我欲富則我前日為卿嘗辭十萬之

祿今乃受此萬鍾之饋是我雖欲富亦不為此也

輔氏曰謂

時子不知我之去乃為道之不行而於義不可不去耳今乃以是誘我設使我誠欲其富則前日方辭十萬之祿今日乃受萬鍾之饋則豈欲富者乎齊王時子之事是皆就人欲計較中來若孟子之意則道合則從不可則去惡用是多端也哉

季孫曰異哉子叔疑使己為政不用則亦已矣又使其子弟為卿人亦孰不欲富貴而獨於富貴之中有私龍

斷焉

龍音壘

此孟子引季孫之語也季孫子叔疑不知何時人龍

斷岡壟之斷而高也義見下文蓋子叔疑者嘗不用而使其子弟為卿季孫譏其既不得於此而又欲求得於彼如下文賤丈夫登龍斷者之所為也孟子引

此以明道既不行復受其祿則無以異此矣

輔氏曰舉季孫

所譏子叔疑之事以見我不敢效此之意辭祿而受饋雖多寡之不同畢竟是既不得於此而又求得於彼也

古之為市者以其所有易其所無者有司者治之耳有賤丈夫焉必求龍斷而登之以左右望而罔市利人皆

以為賤故從而征之征商自此賤丈夫始矣

孟子釋龍斷之說如此治之謂治其爭訟左右望者欲得此而又取彼也罔謂罔羅取之也從而征之謂

人惡其專利故就征其稅後世緣此遂征商人也

輔氏

曰丈王闕譏不征是  
三代之初皆如是也

○程子曰齊王所以處孟子者

未為不可孟子亦非不肯為國人矜式者但齊王實

非欲尊孟子乃欲以利誘之故孟子拒而不受

輔氏曰程

子恐讀書者不察誤認  
孟子之意故辨明之



○孟子去齊宿於晝

晝如字或曰當作晝音獲下同

晝齊西南近邑也

有欲為王留行者坐而言不應隱几而臥

為去聲下同隱於靳反

隱憑也客坐而言孟子不應而卧也

客不悅曰弟子齊宿而後敢言夫子卧而不聽請勿復  
敢見矣曰坐我明語子昔者魯繆公無人乎子思之側  
則不能安子思泄柳申詳無人乎繆公之側則不能安  
其身

齊側皆反復扶又反語去聲

齊宿齊戒越宿也繆公尊禮子思常使人候伺道

達誠意於其側乃能安而留之也

輔氏曰好賢之心切唯恐有不

當其意故其計必出於此也

泄柳魯人申詳子張之子也繆公

尊之不如子思然二子義不苟容非有賢者在其

君之左右維持調護之則亦不能安其身矣

或問二子

之賢其心固如是乎曰非謂二子之心為然也語其勢則然耳若二子之心如此則與世之垢面汙行而事君側便嬖之人者何以異乎○輔氏曰此李先生說也謂若謂二人必欲常有人譽己於君側乃能自安則是奸道也豈足為賢況泄柳嘗閉門以避繆公豈既仕而若此乎蓋二子直道以事

君義不苟合非有賢者為之主持必不見容非  
欲人之譽己者是也泄柳申詳無人乎繆公之  
側則不能安其身恐繆公不察己之誠也繆公  
無人乎子思之側則不能安子思恐子思弗察  
己之誠也臣而惟恐君之弗察其誠則其合也  
難其行道也不易使其君唯恐己之弗察其誠  
則其合也易其行道也不難繆公之待二子固  
不若子思矣然子思之與二子事皆其所自取  
如形影之相似也德若子思則亦應有此若只  
得泄柳申詳則又只得如此耳下是則苟容以徇  
君者也

子為長者慮而不及子思子絕長者乎長者絕子乎

長上  
聲

長者孟子自稱也言齊王不使子來而子自欲為王

留我是所以為我謀者不及繆公留子思之事而先

絕我也我之卧而不應豈為先絕子乎

輔氏曰孟子之自處不在

子思之下故意或人之為我謀不及繆公留子思之事也蓋有欲為王留行者雖有愛賢之意而不知待賢之禮故孟子告之如此

○孟子去齊尹士語人曰不識王之不可以為湯武則是不明也識其不可然且至則是干澤也千里而見王不遇故去三宿而後出晝是何濡滯也士則茲不悅

語去

聲

尹士齊人也干求也澤恩澤也濡滯遲留也

高子以告

高子亦齊人孟子弟子也

曰夫尹士惡知予哉千里而見王是予所欲也不過故去豈予所欲哉予不得已也

夫音扶下同惡平聲

見王欲以行道也今道不行故不得已而去非本欲如此也

予三宿而出晝於予心猶以為速王庶幾改之王如改諸則必反予

所改必指一事而言然今不可考矣

輔氏曰度孟子之於齊王必有

為之兆者王不能用故去之然孟子不言其事故不可考其所以不言者或是當時人自知之也

夫出晝而王不予追也予然後浩然有歸志予雖然豈舍王哉王由足用為善王如用予則豈徒齊民安天下之民舉安王庶幾改之予日望之

浩然如水之流不可止也楊氏曰齊王天資朴實如

好勇好貨好色好世俗之樂皆以直告而不隱於孟  
子故足以為善若乃其心不然而謬為大言以欺人  
是人終不可與入堯舜之道矣何善之能為

輔氏曰  
齊宣王

資質大略與齊桓公漢高祖相似樸實不欺又與孟子問答不忍之心時亦有所發明故孟子拳拳然以為足用為善然終是志不足以帥氣道不足以勝習故孟子不得已而去之

予豈若是小丈夫然哉諫於其君而不受則怒悻悻然  
見於其面去則窮日之力而後宿哉

悻形頂反  
見音現

悻悻怒意也窮盡也

尹士聞之曰士誠小人也

此章見聖賢行道濟時汲汲之本心愛君澤民惓惓

之餘意

輔氏曰本心謂其初本欲如此也餘意則後來不得已之意耳詳玩此兩句便可見聖賢

之心千里見王王如用予豈特齊民安天下之民舉安此其行道濟時汲汲之本心三宿出晝王庶幾改之予日望之此其愛君澤民惓惓之餘意李氏曰於此見君子憂則違之

之情而荷蕢者所以為果也

語錄曰孟子與荷蕢皆是憂則違之但荷蕢皆

於去不若孟子之遲遲吾行蓋得時行道者聖人之本心不遇而去者聖人之不得已此與孔子去魯之心同蓋聖賢憂世濟時之誠心非若荷蕢之果於去也



○孟子去齊充虞路問曰夫子若有不豫色然前日虞聞諸夫子曰君子不怨天不尤人

路問於路中間也豫悅也尤過也此二句實孔子之言蓋孟子嘗稱之以教人耳

曰彼一時此一時也

彼前日此今日

五百年必有王者興其間必有名世者

自堯舜至湯自湯至文武皆五百餘年而聖人出名

世謂其人德業聞望可名於一世者為之輔佐若皋陶稷契伊尹萊朱太公望散宜生之屬

由周而來七百有餘歲矣以其數則過矣以其時考之則可矣

周謂文武之間數謂五百年之期時謂亂極思治可以有為之日於是而不得一有所為此孟子所以不能無不豫也

夫天未欲平治天下也如欲平治天下當今之世舍我

其誰也吾何為不豫哉

夫音扶舍上聲

言當此之時而使我不過於齊是天未欲平治天下也然天意未可知而其具又在我我何為不豫哉然

則孟子雖若有不豫然者而實未嘗不豫也

輔氏曰自五百

年至則可矣觀之則孟子不能無不豫然也自夫

蓋

天未欲平治以下觀之則孟子實未嘗不豫也聖賢憂世之志樂天之誠有並行而不悖者於此見

矣

輔氏曰不能無不豫者憂世之心也所謂與民同患之仁也實未嘗不豫者樂天之事也所謂與天

為一之誠也憂樂自常情觀之則相反自聖賢言之則並行而不悖也即此章之事則可見矣

○孟子去齊居休公孫丑問曰仕而不受祿古之道乎  
休地名

曰非也於崇吾得見王退而有去志不欲變故不受也  
崇亦地名孟子始見齊王必有所不合故有去志變  
謂變其去志

繼而有師命不可以請久於齊非我志也

師命師旅之命也國既被兵難請去也

語錄曰或謂師友之師非

師旅之師曰欲授孟子室乃孟子辭去時所謂於崇  
吾得見王則初見齊王時事以此考之則師旅為當

○孔氏曰仕而受祿禮也不受齊祿義也義之所在禮有時而變公孫丑欲以一端裁之不亦誤乎

輔氏曰仕

受祿禮之常也孟子之不受齊祿禮之變也君子以義起禮故義之所在禮有時而變也蓋禮則一定義則權其禮之可否者也  
可則行否則變如此然後得乎時措之宜也公孫丑之學未能造此故欲以一端裁之此其所以誤也

孟子纂疏卷四

欽定四庫全書

經部

四書纂疏孟子卷

五  
六

詳校官大理寺卿臣富炎泰

刑部郎中臣許兆椿覆勘

總校官原任中允臣王燕緒

校對官典簿臣郭祚熾

謄錄監生臣金國禮

欽定四庫全書

孟子纂疏卷五

宋

趙順孫撰

朱子集註

滕文公章句上

凡五章

滕文公為世子將之楚過宋而見孟子

世子太子也

孟子道性善言必稱堯舜

道言也性者人所稟於天以生之理也渾然至善未嘗有惡人與堯舜初無少異但衆人汨於私欲而失之堯舜則無私欲之蔽而能充其性爾故孟子與世子言每道性善而必稱堯舜以實之欲其知仁義不假外求聖人可學而至而不懈於用力也

或問此一節曰性善

者以理言之稱堯舜者質其事以實之所以互相發也其言蓋曰知性善則有以知堯舜之必可為矣知堯舜之可為則其於性善也信之益篤而守之益固矣○文集曰天之生此人無不與之以仁義禮智之理亦何嘗有不善但欲生此物必須有氣然後此物有以聚而成質而氣之為物有清濁昏明之不同稟



其清明之氣而無物欲之累則為聖稟其氣清明而  
未純全則未免微有物欲之累而能克以正之則為  
賢稟其昏濁之氣又為物欲之所蔽而不能去則為  
愚為不肖是皆氣稟物欲之所為而性之善未嘗不  
同也堯舜之生所受之性亦如是耳但以其氣稟清  
明自無物欲之蔽故為堯舜初非有所增益於性分  
之外也故學者知性善則知堯舜之聖非是強為識  
得堯舜做處則便識得性善底規模樣子而凡吾日  
用之間所以去人欲復天理者皆吾分內當然之事  
其勢至順而無難此孟子所以首為文公言之而又  
稱堯舜以實之也○語錄曰七篇論性處只此一處  
較說得盡須是日日認一過○又曰性善故人皆可  
為堯舜必稱堯舜所以驗性善之實○又曰道性善  
與稱堯舜二句正相表裏蓋人所以不至於堯舜者  
是他力量不至固無可奈何然人須當以堯舜為法  
方做得箇人無所欠闕然也只是本分事○問惟堯

舜為能無物欲之蔽而充其性人蓋有恬於嗜慾而不能充其性者何故曰不蔽於彼則蔽於此不蔽於此則蔽於彼畢竟須有蔽處物欲亦有多少般如白日須是雲遮方不見若無雲豈應不見然此等處緊要在性字上今且合思量如何是性在我為何物反求吾心有蔽無蔽能充不能充必論堯如何舜又如何○黃氏曰性者人之所得於天之道之不明久矣舉此性者也苟盡此性堯舜可為也

天下之人汨沒於利欲之中貪夫殉財烈士殉名夸者死權品庶馮生天之所以與我而堯舜可為者惜然莫覺也誠能深思孟子之言而厲之以自彊之志則將有超然獨立乎萬物之表而天下之至貴無以復加

**門人不能悉記其辭而撮其大旨如此**輔氏曰朱子既

斷孟子之書以為孟子自著則似**程子曰性即理也**此處皆當改此是後來不曾改得

天下之理原其所自未有不善喜怒哀樂未發何嘗不善發而中節即無往而不善發不中節然後為不善故凡言善惡皆先善而後惡言吉凶皆先吉而後

凶言是非皆先是而後非

文集曰天理固無對然既有人欲即天理便不得不與人

欲為消長善亦本無對然既有惡即善便不得不與惡為盛衰譬如普天之下莫非王土率土之濱莫非王臣此本豈有對哉至於晉有五胡唐有三鎮則華夷逆順不得不相與為對矣但其初則有善而無惡有天理而無人欲耳。語錄曰性只是此理。又曰性是天生成許多道理。又曰性是許多理散在處為性。又曰在心喚做性在事喚做理。又曰性即理也四字顛撲不破實自己上見得出來。又曰如

性即理也。一語直自孔子後，惟是伊川說得盡。是千萬世說性之根。基理是箇公共底物事，不解會不善人做，不是自是失了性，却不是壞了着修。又曰：性即理也。當然之理，無有不善者。問：凡言善惡，必先善而後惡，何也？曰：先有理而後有氣也。真氏曰：性即理也。乃自昔聖賢之所未言。萬世言性之標準。

世子自楚反，復見孟子。孟子曰：世子疑吾言乎？夫道一

而已矣。

復扶又反  
夫音扶

時人不知性之本善，而以聖賢為不可企及。故世子於孟子之言，不能無疑，而復來求見，蓋恐別有卑近易行之說也。孟子知之故，但告之如此，以明古今聖

愚本同一性前言已盡無復有他說也

或問世子疑孟子之言而

孟子之不拒何也曰孟子之言非當時所常聞也故聞者非徒不之信而亦莫之疑也世子復來則豈其思之未得而不舍於心與故孟子雖若怪之而實喜其能思而將有以進乎此也。文集曰當戰國之時聖學不明天下之人但知功利之可求而不知已性之本善聖賢之可學聞是說者非惟不信往往亦不復致疑於其間若文公則雖未能盡信而已能有所疑矣是其可與進善之萌芽也故孟子於其去而復來迎而謂之曰世子疑吾言乎而又告之曰夫道一而已矣蓋古今聖愚同此一性則天下固不容有二道但在篤信力行則天下之理雖有至難猶必可至況善乃人之所本有而為之不難乎。輔氏曰二說自不相礙集註則言世子所以致疑者其意如此講義則言世子比當時之人則尚能致疑於其間二說

相須其義始備性本一  
理則道無二致故也

成覲謂齊景公曰彼丈夫也我丈夫也吾何畏彼哉顏  
淵曰舜何人也予何人也有為者亦若是公明儀曰文  
王我師也周公豈欺我哉

覲古  
覲反

成覲人姓名彼謂聖賢也有為者亦若是言人能有  
為則皆如舜也公明姓儀名魯賢人也文王我師也  
蓋周公之言公明儀亦以文王為必可師故誦周公  
之言而歎其不我欺也孟子既告世子以道無二致

而復引此三言以明之欲世子篤信力行以師聖賢

不當復求他說也

文集曰孟子引三段說話教人如此發憤勇猛向前日用之間不得

存留一豪人欲之私在這裏此外更無別法若如此有箇奮迅興起處方有田地可下工夫不然即是畫

脂鏤冰無真實得力處也

今滕絕長補短將五十里也猶可以為善國書曰若藥

不暝眩厥疾不瘳

暝莫甸反眩音縣

絕猶截也書商書說命篇暝眩憤亂

文集曰如服暝眩之藥以除深

錮之病直是不可悠悠。又曰大要為聖賢須是猛喫暝眩之藥相似服教他麻了一上及其定疊病自

退了。蔡氏曰方言曰飲藥而毒海岱之間謂之瞑眩

言滕國雖小猶足為治

但恐安於卑近不能自克則不足以去惡而為善也

輔氏曰此可見孟子之所謂性與道非外事與物而言之也

○愚案孟子之言性

善始見於此而詳具於告子之篇然默識而旁通之則七篇之中無非此理其所以擴前聖之未發而有

功於聖人之門程子之言信矣

輔氏曰性善是那義理之綱領識得性善

則凡出處語默言論風旨凡孟子所說許多義理皆自此流出無有一事是在外者因人不識其性善故言不及惟程子學已至到故知得孟子此說真能擴前聖所未發而有功於聖人之門也。○真氏曰七篇



之中無非此意者如言仁義言四端蓋其大者至於因齊王之愛牛而勸之以行王政亦因其性善而引之當道也以此推之他可識矣

○滕定公薨世子謂然友曰昔者孟子嘗與我言於宋於心終不忘今也不幸至於大故吾欲使子問於孟子然後行事

定公文公父也然友世子之傅也大故大喪也事謂喪禮

然友之鄒問於孟子孟子曰不亦善乎親喪固所自盡

也曾子曰生事之以禮死葬之以禮祭之以禮可謂孝矣諸侯之禮吾未之學也雖然吾嘗聞之矣三年之喪齊疏之服飭粥之食自天子達於庶人三代共之

齊音資疏

所居反飭  
諸延反

當時諸侯莫能行古喪禮而文公獨能以此為問故孟子善之又言父母之喪固人子之心所自盡者蓋悲哀之情痛疾之意非自外至宜乎文公於此有所不能自已也但所引曾子之言本孔子告樊遲者豈

曾子嘗誦之以告其門人歟三年之喪者子生三年

然後免於父母之懷故父母之喪必以三年也

或問三年

之喪曰人子之心無窮也聖人以為子生三年而後免於父母之懷也故為之立中制節使賢者不得過不肖者不及也齊衣下縫也不緝曰斬衰緝之曰齊衰䟽

麤也麤布也飭糜也喪禮三日始食粥既葬乃䟽食

語錄曰孟子答滕文公喪禮不說到細碎上只說齊䟽之服飭粥之食自天子達於庶人這二項便是大原本此古今貴賤通行之禮也

愚謂自天子達於庶人是無貴賤之別三

代共之是無古今之異

然友反命定為三年之喪父兄百官皆不欲曰吾宗國魯先君莫之行吾先君亦莫之行也至於子之身而反之不可且志曰喪祭從先祖曰吾有所受之也

父兄同姓老臣也滕與魯俱文王之後而魯祖周公為長兄弟宗之故滕謂魯為宗國也

語錄曰古宗法如周公兄弟之

為諸侯者則皆以魯國為宗至戰國時滕猶稱魯為宗國也

然謂二國不行三年

之喪者乃其後世之失非周公之法本然也志記也引志之言而釋其意以為所以如此者蓋為上世以

來有所傳受雖或不同不可改也然志所言本謂先王之世舊俗所傳禮文小異而可以通行者耳不謂後世失禮之甚者也

謂然友曰吾他日未嘗學問好馳馬試劍今也父兄百官不我足也恐其不能盡於大事子為我問孟子然友復之鄒問孟子孟子曰然不可以他求者也孔子曰君薨聽於冢宰歆粥面深墨即位而哭百官有司莫敢不哀先之也上有好者下必有甚焉者矣君子之德風也

小人之德草也草尚之風必偃是在世子

好為皆去聲復扶又反

川悅反

不我足謂不以我滿足其意也然者然其不我足之

言不可他求者言當責之於已

輔氏曰是應前而固所自盡之說

冢

宰六卿之長也獸飲也深墨甚黑色也即就也尚加

也論語作上古字通也偃仆也孟子言但在世子自

盡其哀而已

輔氏曰是應上句不可他求之意

然友反命世子曰然是誠在我五月居廬未有命戒百

官族人可謂曰知及至葬四方來觀之顏色之戚哭泣之哀弔者大悅

諸侯五月而葬未葬居倚廬於中門之外居喪不言

故未有命令教戒也可謂曰知疑有闕誤或曰皆謂

世子之知禮也

輔氏曰若如或者之說則可字當作皆字若作可字則不成文理○

林氏曰孟子之時喪禮既壞然三年之喪惻隱之心痛疾之意出於人心之所固有者初未嘗亡也惟其溺於流俗之弊是以喪其良心而不自知耳文公見

孟子而聞性善堯舜之說則固有以啟發其良心矣  
是以至此反躬自責悼其前行之不足以取信而不  
敢有非其父兄百官之心雖其資質有過人者而學  
問之力亦不可誣也及其斷然行之而遠近見聞無  
不悅服則以人心之所同然者自我發之而彼之心  
悅誠服亦有所不期然而然者人性之善豈不信哉

輔氏曰林氏之說雖集註翦截增益以成之然辭順  
義精說得人心事理坦然明白學者苟能熟玩而深  
繹之則必有所發於已而知性善之旨矣至論文公  
反躬自責悼其前行之不足取信而不敢有非其父



兄百官之心以為學問之力則尤有益於學者大凡學者必須知此理然後有進而識古人為己之學之意矣

○滕文公問為國

文公以禮聘孟子故孟子至滕而文公問之

輔氏曰前則云

使然友問後則云使畢戰問此但言滕文公問則知是文公親問孟子也蓋文公既即位固不可越國往見孟子則必是以禮聘孟子至滕而文公問之也

孟子曰民事不可緩也詩云晝爾于茅宵爾索綯亟其

秉畀其始播百穀

絢音陶亟紀力反

民事謂農事詩豳風七月之篇于往取也絢紵也亟

急也乘升也

詩傳曰晝往取茅夜而絞索亟升其屋而治之不待督責而自相警戒不敢休

息如此。愚謂絢繩之絞也所用蓋野廬之屋者

播布也言農事至重人君

不可以為緩而忽之故引詩言治屋之急如此者蓋

以來春將復始播百穀而不暇為此也

輔氏曰詩言民之趨於農

功自然如此其亟孟子引之以證其民事不可緩之說然熟玩之便見得民事真不可緩之意人君者若能真知民事之不可緩則於為國也思過半矣

民之為道也有恒產者有恒心無恒產者無恒心苟無

恒心放僻邪侈無不為已及陷乎罪然後從而刑之是

罔民也焉有仁人在位罔民而可為也

音義並見前篇

是故賢君必恭儉禮下取於民有制

恭則能以禮接下儉則能取民以制

愚謂人君纔恭敬則自然能以

禮接下纔節儉則自然能取民以制禮下所以開世

法也助徹之

陽虎曰為富不仁矣為仁不富矣

陽虎陽貨魯季氏家臣也天理人欲不容並立虎之

言此恐為仁之害於富也孟子引之恐為富之害於

仁也君子小人每相反而已矣

輔氏曰天理人欲固不容於並立然先儒

多以為孟子取陽貨之言是不以人廢言之公心惟集註以為所言雖同而所取各異君子小人每相反而已者其說尤為的當

夏后氏五十而貢殷人七十而助周人百畝而徹其實

皆什一也徹者徹也助者藉也

徹教列反藉子夜反

此以下乃言制民常產與其取之之制也夏時一夫

受田五十畝而每夫計其五畝之入以為貢商人始

為井田之制以六百三十畝之地畫為九區區七十

畝中為公田其外八家各授一區但借其力以助耕

公田而不復稅其私田

語錄曰貢助異法貢則直計其五畝之入自賦於官助則

須計公田之中八家各助七畝只得五十六畝則十四畝須依古法折除一家各得一畝若干步為廬舍

方成八家各助耕公田七畝也。永嘉陳氏曰夏商若同是井田則皆八家同為一井但田分多寡耳夏

之井則為五十畝者九其中五十畝為公田此以周井田則為七十畝者九其中七十畝為公田此以周井田

法約之但孟子言唯助為有公田貢則什取其一即是夏之貢不井但於五十畝之中抽十之一以供貢

商之助則井却於七十畝之周時一夫授田百畝鄉

遂用貢法十夫有溝都鄙用助法八家同井耕則通

力而作收則計畝而分故謂之徹

語錄曰先王疆理天下之初做許多

畝溝澮洫之類大段是費人力了若是自五十而增為七十自七十而增為百畝則田間許多疆理都合

更改恐無是理孟子當時未必親見只是傳聞如此恐亦難盡信也○問鄉遂用貢法都鄙用助法耕則

通力而作收則計畝而分永嘉諸人皆謂鄉遂都鄙初無二制不知何以考之也曰此亦不可詳知但因

洛陽議論中通徹而耕之說推之耳或但耕則通力而耕收則各得其畝亦未可知也鄉遂都鄙田制不

同周禮分明如近年新說只教畫在紙上亦畫不成如何行得去若如此則有田之家一處受田一處應

役彼此交互難相統一官司實難稽考民間易生弊病公私煩擾不可勝言聖人立法必不如此也○問

都鄙用助法八家同井鄉遂用貢法十夫有溝鄉遂所以不為井者何故曰都鄙以四起數五六家始出一人故甸出甲士三人步卒七十二人鄉遂以五起數家出一人為兵以守衛王畿役次必簡故周禮惟挽匱則用之此役之最輕者。陳氏曰周制國中鄉遂之地用貢法田不井授但為溝洫一夫受田百畝與同溝之人通力合作計畝均收大率什而賦其一野外都鄙之地用助法田以井授中百畝為公田八家各私外百畝同養公田。永嘉陳氏曰鄉遂用貢法遂人是也都鄙用助法匠人是也案遂人云百夫有洫十夫有溝溝即不見得包溝洫在內若是在內常云百夫十夫之間矣匠人溝洫却在內故皆以開言方十里者以開方法計之為九百夫方百里者以開方法計之為九萬夫遂人匠人兩處各是一法朱子總其說謂貢法十夫有溝助法八家同井其言簡而盡矣但不知其必分二法者何故竊意鄉遂之地

在近郊遠郊之間六軍之所從出必是平原廣野可  
畫為萬夫之田有溝有洫又有途路方員可以如圖  
蓋萬夫之地所占不多以井田一同法約之止有九  
分之一故以徑法攤算逐一見其子數若都鄙之地  
謂之甸稍縣都乃公卿大夫之采地邑山林陵麓在  
內難用溝洫法整齊分畫故逐處畫為井田雖有溝  
洫不能如圖故但言在其間其地縣亘一同之其實  
地為萬夫者九故以徑法紐算但止言其母數其  
皆什一者貢法固以十分之一為常數惟助法乃是  
九一而商制不可考周制則公田百畝中以二十畝  
為廬舍一夫所耕公田實計十畝通私田百畝為十  
一分而取其一蓋又輕於十一矣竊料商制亦當似



此而以十四畝為廬舍一夫實耕公田七畝是亦不

過什一也

輔氏曰其曰助法乃是九一者是以文王治岐耕者九一及下文請野九一而助知

其然也而商制實無可考其曰竊料商制亦當如周制則一夫實耕公田七畝通私田七十畝亦為十一

分而取其一也與九一之制亦不合然十一而取其一則亦與什一之制不爭多故曰其實皆什一也

徹通也均也

輔氏曰謂徹法耕則通力而共作收則計畝而均分也

藉借也

龍子曰治地莫善於助莫不善於貢貢者校數歲之中以為常樂歲粒米狼戾多取之而不為虐則寡取之凶年糞其田而不足則必取盈焉為民父母使民盻盻然

將終歲勤動不得以養其父母又稱貸而益之使老稚

轉乎溝壑惡在其為民父母也

樂音洛盼五禮反從目從兮或音普覓反者非

養去聲  
惡平聲

龍子古賢人狼戾猶狼藉言多也糞擁也盈滿也

謂愚

此言豐樂之歲其粒米狼藉饒多雖多取之而不為暴虐則以寡取之凶荒之年糞其田尚不足則以取滿其常數焉是則校數歲之中以為常之意也盼恨視也勤動勞苦也稱舉

也貸借也取物於人而出息以償之也益之以足取

盈之數也稚幼子也

夫世祿滕固行之矣

扶夫音

孟子嘗言文王治岐耕者九一仕者世祿二者王政之本也今世祿滕已行之惟助法未行故取於民者無制耳蓋世祿者授之土田使之食其公田之入實與助法相為表裏所以使君子野人各有定業而上下相安者也故下文遂言助法

詩云雨我公田遂及我私惟助為有公田由此觀之雖

周亦助也

雨于付反

詩小雅大田之篇雨降雨也言願天雨於公田而遂

及私田先公而後私也

詩傳曰言農夫之心先公後私故望此雨而曰天其雨我

公田而遂及我之私田乎

當時助法盡廢典籍不存惟有此詩可

見周亦用助故引之也

語錄曰考之周禮行助法處有公田行貢法處無公田。

又曰孟子不曾見周禮只據詩裏說用詩意帶將去

設為庠序學校以教之庠者養也校者教也序者射也  
夏曰校殷曰序周曰庠學則三代共之皆所以明人倫  
也人倫明於上小民親於下

庠以養老為義校以教民為義序以習射為義皆鄉  
學也學國學也共之無異名也倫序也父子有親君  
臣有義夫婦有別長幼有序朋友有信此人之大倫  
也庠序學校皆以明此而已語錄曰問鄉學如何曰皆於農隙而學曰執與  
教之曰鄉大夫有德行而致其仕者教之○輔氏曰養老序射皆學校教人之事特三代欲異其名故取義不同耳然此三者皆鄉學也故異名至於國學則但同謂之學而已言學則庠校序皆舉之矣鄉學雖有異名國學雖無異名然其明人倫以教之之事則同也

有王者起必來取法是為王者師也

滕國褊小雖行仁政未必能興王業然為王者師則雖不有天下而其澤亦足以及天下矣聖賢至公無

我之心於此可見

語錄曰孟子只說有王者起必來取法是為王者師是亦要國大方

做得小底亦不奈何。輔氏曰所謂聖賢則總五帝三王及輔佐之賢與夫孔子孟子而言之也恭儉德也禮下取民有制政事也貢助徹法度也學校教也所以成終也內外兩盡政教具舉本末始終有序為國之道備矣國雖褊小勢不能致王業之興然有王者作必來取法為王者師則德澤亦足以及於天下矣於此可見聖賢至公無我之心而或者猶疑孟子不當勸齊王行王道者何哉齊梁地廣民衆其不王者不為耳故孟子勸以行王政滕國壤地褊小雖行仁政未必能興王業也故教以彊為善以為王者師

以此見孟子之道能大  
能小無不可為之事也

詩云周雖舊邦其命惟新文王之謂也子力行之亦以  
新子之國

詩大雅文王之篇言周雖后稷以來舊為諸侯其受  
天命而有天下則自文王始也子指文公諸侯未踰  
年之稱也

使畢戰問井地孟子曰子之君將行仁政選擇而使子  
子必勉之夫仁政必自經界始經界不正井地不均穀

祿不平是故暴君汙吏必慢其經界經界既正分田制

祿可坐而定也

扶夫音

畢戰滕臣文公因孟子之言而使畢戰主為井地之

事故又使之來問其詳也

輔氏曰因其使畢戰來問故知是使畢戰主為其事

而因使之來問其詳也度孟子之來滕國不久便去故使畢戰往問之若孟子尚留滕國則文公亦必親與之商

井地即井田也

愚謂井地則言其始以地而畫井耳井田則因其田既已

成井而經界謂治地分田經畫其溝塗封植之界也

言之也  
輔氏曰治地謂開辟其方里為井之地也分田謂分為九百畝之田也田側有溝壑上有塗封植則封其



所植之木以  
為界止也

此法不修則田無定分而豪強得以兼

并故井地有不均賦無定法而貪暴得以多取故穀

祿有不平

輔氏曰經畫界止之法不修則田無定制  
不定為一夫授田百畝之制而民之豪強

者惟其所取得以兼并其他人之所有我之所占者  
既多則人之所得者或少故於井地有不均賦無定  
法則不特取公田十一之賦而暴君貪吏惟其所取  
得以衰斂其私田之所入此或得祿之多彼或得祿  
之少故於穀  
祿有不平此欲行仁政者之所以必從此始而暴

君汙吏則必欲慢而廢之也

輔氏曰若有仁君欲行  
仁政使彼此均平田無

多少之差則必從經界之事做起而暴君汙吏貪得  
務多只知有我不知有民只知為己不知為人者則

必欲慢而廢之也凡事須是敬則能  
立才有慢心事便日趨於弊壞也

有以正之則分

田制祿可不勞而定矣

夫滕壤地褊小將為君子焉將為野人焉無君子莫治

野人無野人莫養君子

夫音扶  
養去聲

言滕地雖小然其間亦必有為君子而仕者亦必有

為野人而耕者是以分田制祿之法不可偏廢也

輔

曰國無大小雖小國亦有仕於朝為君子者亦必有  
耕於野而為野人者無君子則孰治小人無野人則  
孰養君子言此以見分田制祿之法不可  
偏廢而有國者之於經畫誠不可以慢也

請野九一而助國中什一使自賦

此分田制祿之常法所以治野人使養君子也野郊外都鄙之地也九一而助為公田而行助法也國中郊門之內鄉遂之地也田不井授但為溝洫使什而自賦其一蓋用貢法也周所謂徹法者蓋如此

語錄曰野

謂甸稍縣都行九一法國中什一以在王城豐凶易察。又曰國中行鄉遂之法如五家為比五比為閭四閭為族四族為黨五黨為州又如五人為伍五伍為兩四兩為卒五卒為旅五旅為師五師為軍皆五五相連屬所以行不得那九一之法故只得什一使自賦如鄉遂却行井牧之法鄉遂之法次第是一家

出一人兵且如五家為比比便有一箇長了井牧之法次第是三十家方出得士十人徒十人。輔氏曰郊外都鄙用助法則收其公田之所入以為君子之祿食國中鄉遂用貢法則使耕者什而自賦其一以充國家之所用其速近之所以不同者詳已見前段此周之所謂徹法也前所謂徹者通也均也者所以釋徹字之義此則正言其以此推之當時非惟助法不行其貢亦不法是如此

止什一矣

輔氏曰以其請野九一而助則知助法之不行又云國中什一使自賦則當時之貢

法亦有彊取其賦於什一之外者矣

卿以下必有圭田圭田五十畝

此世祿常制之外又有圭田所以厚君子也

語錄曰卿受田

六十邑乃當二百四十井此外又有圭田五十畝也  
○問卿士大夫之有圭田必有耕之者豈亦有耕屬  
可耕乎恐圭田只是給公田之在民者如井九百畝  
而百畝為公田之類曰其制未及詳考大抵古者田  
祿皆是助法之公田充而八家因為之屬如有田一  
成有衆一旅是也圭田恐亦如此故王制云圭田無  
征圭潔也所以奉祭祀也不言世祿者滕已行之但  
此未備耳

餘夫二十五畝

程子曰一夫上父母下妻子以五口八口為率受田  
百畝如有弟是餘夫也年十六別受田二十五畝俟

其壯而有室然後更受百畝之田愚按此百畝常制

之外又有餘夫之田以厚野人也

語錄曰餘夫二十五畝乃是十六歲

以前所受在一夫百畝之外也

死徙無出鄉鄉田同井出入相友守望相助疾病相扶持則百姓親睦

死謂葬也徙謂徙其居也同井者八家也友猶伴也

守望防寇盜也

輔氏曰鄉謂萬二千五百人為鄉之鄉死徙無出鄉者死而葬者徙而居

者皆不可出其鄉也鄉田同井者同鄉之人則八家同為一井一井之中其出入則自相為伴防禦寇盜

則自相為助疾病則自相扶持此張子所謂井田救災恤患之事也如此則朝夕同處自然親睦也此又言助法之善也

方里而井井九百畝其中為公田八家皆私百畝同

養公田公事畢然後敢治私事所以別野人也

養去聲別

彼到反

此詳言井田形體之制乃周之助法也

輔氏曰上既言助法之善

故此下遂言周之助法也方里而井井九百畝其中為公田便是井田形體之制也公田以為

君子之祿而私田野人之所受先公後私所以別君

子野人之分也不言君子據野人而言省文耳上言野及國中二法此獨詳於治野者國中貢法當世已行但取之過於什一爾

此其大略也若夫潤澤之則在君與子矣

扶夫音

井地之法諸侯皆去其籍此特其大略而已潤澤謂因時制宜使合於人情宜於土俗而不失乎先王之意也

輔氏曰此非是解此二字之義乃就井田之法上言必能如此立法然後可謂之潤澤也

呂氏曰子張子慨然有意三代之治論治人先務未



始不以經界為急講求法制粲然備具要之可以行  
于今如有用我者舉而措之耳嘗曰仁政必自經界  
始貧富不均教養無法雖欲言治皆苟而已世之病  
難行者未始不以亟奪富人之田為辭然茲法之行  
悅之者衆苟處之有術期以數年不刑一人而可復  
所病者特上之未行耳乃言曰縱不能行之天下猶  
可驗之一鄉方與學者議古之法買田一方畫為數  
井上不失公家之賦役退以其私正經界分宅里立

斂法廣儲蓄興學校成禮俗救菑恤患厚本抑末足

以推先王之遺法明當今之可行有志未就而卒

輔氏

曰張子之學已到古聖人之心事故見得治天下先務必當以經界為急於是力致詳究知其法之行悅之者衆苟行之有術期以數年不刑一人而可復既不得行則又欲私為而小驗之以明先王之法無不可行者以待後之  
○愚案喪禮經界兩章見孟子之君子嗚呼仁哉

學識其大者是以雖當禮法廢壞之後制度節文不可復考而能因略以致詳推舊而為新不屑屑於既往之迹而能合乎先王之意真可謂命世亞聖之才

矣

輔氏曰常人而欲法古先哲王之事於後世者往往不曾先得古人之心屑屑然泥其既往之迹到

行不得處則反出其私意穿鑿杜撰以求其必濟甚者至於嚴刑峻法以箝人之議彊民之從於是與先王之意背馳非徒無益而又害之者多矣唯孟子之學識其大者謂先得古先哲王之心也是以雖當禮法廢壞之後制度節文不可復考而能因略而致詳謂因其大體而詳其節目推舊以為新謂推其既往以為今日之制雖不屑屑於已往之迹而能合於先王之意此與聖賢同一心事同一軌轍信非命世亞聖之大才不能為也

○有為神農之言者許行自楚之滕踵門而告文公曰

遠方之人聞君行仁政願受一廛而為氓文公與之處

其徒數十人皆衣褐捆屨織席以為食

衣去聲  
捆音闊

神農炎帝神農氏始為耒耜教民稼穡者也為其言

者史遷所謂農家者流也許姓行名也踵門足至門

也仁政上章所言井地之法也

輔氏曰此可見人心之所同不獨孟子以

為仁政而當時之人亦莫不以為仁政也廛民所居也

輔氏曰前言市廛則為市中之宅此

但言廛則為民所居而已

氓野人之稱褐毛布賤者之服也捆扣

掇之欲其堅也

愚謂織屨必扣掇者蓋擊之使堅實也

以為食賣以供

食也程子曰許行所謂神農之言乃後世稱述上古

之事失其義理者耳猶陰陽醫方稱黃帝之說也

或問

許行為神農之言而有君民並耕市不二賈之說何耶曰程子之言盡矣然以易考之二者皆神農之所為也當時民淳事簡容或有如許行之說者及乎世變風移至於唐虞之際則雖神農復生亦當隨時以立政而不容固守其舊矣況許行之妄乃欲以是而行於戰國之時乎○輔氏曰陰陽醫方所稱黃帝之說如素問靈樞之類是也使真有神農黃帝之言傳於世孔孟豈得而不稱述之哉

陳良之徒陳相與其弟辛負耒耜而自宋之滕曰聞君行聖人之政是亦聖人也願為聖人氓

陳良楚之儒者耜所以起土耒其柄也

陳相見許行而大悅盡棄其學而學焉陳相見孟子道  
許行之言曰滕君則誠賢君也雖然未聞道也賢者與  
民並耕而食饗飧而治今也滕有倉廩府庫則是厲民  
而以自養也惡得賢

饗音雍飧音孫惡平聲

饗飧熟食也朝曰饗夕曰飧言當自炊爨以為食而  
兼治民事也厲病也許行此言蓋欲陰壞孟子分別

君子野人之法

輔氏曰文公既有意於為國而問於孟子孟子既告之當以經界為始而

文公又使畢戰主為其事矣故鄰國皆知之而有志之士各欲以其所學來告至於異端邪說亦皆欲來

售其說如許行是也許行謂君民尚當並耕而食則  
為君子而仕者可知矣是其說正與孟子分別君子  
野人相反故知許  
行欲陰壞其法也

孟子曰許子必種粟而後食乎曰然許子必織布而後  
衣乎曰否許子衣褐許子冠乎曰冠曰奚冠曰冠素曰  
自織之與曰否以粟易之曰許子奚為不自織曰害於  
耕曰許子以釜甑爨以鐵耕乎曰然自為之與曰否以  
粟易之

衣去聲  
與平聲

釜所以煮甑所以炊爨然火也鐵耜屬也此語八反

皆孟子問而陳相對也

以粟易械器者不為厲陶冶陶冶亦以其械器易粟者豈為厲農夫哉且許子何不為陶冶舍皆取諸其宮中而用之何為紛紛然與百工交易何許子之不憚煩曰百工之事固不可耕且為也

舍去聲

此孟子言而陳相對也械器金甌之屬也陶為甌者治為釜鐵者舍止也或讀屬上句舍謂作陶冶之處也



然則治天下獨可耕且為與有大人之事有小人之事  
且一人之身而百工之所為備如必自為而後用之是  
率天下而路也故曰或勞心或勞力勞心者治人勞力  
者治於人治於人者食人治人者食於人天下之通義  
也

與平聲  
食音嗣

此以下皆孟子言也路謂奔走道路無時休息也

輔氏

曰此但言其勞耳若曰以一人之身而欲自為百工  
之事以足其用則譬如率天下之人奔走於道路而  
無時休息  
也其可哉治於人者見治於人也食人者出賦稅以

給公上也食於人者見食於人也此四句皆古語而孟子引之也君子無小人則飢小人無君子則亂以此相易正猶農夫陶冶以粟與械器相易乃所以相濟而非所以相病也輔氏曰君子勞心以治人而食於人野人勞力以治於人而食人此理天實為之天下萬世之所共由也正猶農夫與陶冶相與易事而以相濟相成也豈有相病之理乎治天下者豈必耕且為哉

當堯之時天下猶未平洪水橫流汜濫於天下草木暢茂禽獸繁殖五穀不登禽獸偪人獸蹄鳥跡之道交於

中國堯獨憂之舉舜而敷治焉舜使益掌火益烈山澤而焚之禽獸逃匿禹疏九河濬濟漯而注諸海決汝漢排淮泗而注之江然後中國可得而食也當是時也禹八年於外三過其門而不入雖欲耕得乎

濬音藥濟子禮反漯他合

反

天下猶未平者洪荒之世生民之害多矣聖人迭興漸次除治至此尚未盡平也洪大也橫流不由其道而散溢妄行也汜濫橫流之貌暢茂長盛也繁殖衆

多也五穀稻黍稷麥菽也登成熟也道路也獸蹄鳥  
跡交於中國言禽獸多也敷布也益舜臣名烈熾也  
禽獸逃匿然後禹得施治水之功疏通也分也九河

曰徒駭曰太史曰馬頰曰覆釜曰胡蘇曰簡曰潔曰

鉤盤曰馬津

蔡氏曰書傳索爾雅九河一曰徒駭二曰太史三曰馬頰四曰覆釜五曰胡蘇

六曰簡潔七曰鉤盤八曰馬津其一則河之經流也  
先儒不知河之經流遂分簡潔為二書傳引此與集

註少異書傳實經朱子晚年所訂正當以為定也

淪亦疏通之意濟漯二水

名

愚案濟水出河東郡垣縣王屋山東南至武德入  
河軼出滎陽北地中又東至琅槐入海漯水出東

郡東武陽縣東決排皆去其壅塞也汝漢淮泗亦皆北至于海

水名也據禹貢及今水路惟漢水入江耳汝泗則入

淮而淮自入海此謂四水皆入于江記者之誤也

語錄

曰決汝漢淮泗而注之江此但作文取其字數以足對偶而云耳若以水路之實論之便有不通說者見其不通便欲強為之說然亦徒為穿鑿而卒不能使之通也如沈括引李翱來南錄云自淮沿流至于高郵乃汴于江因謂淮泗入江乃禹之舊迹故道宛然但今江淮已深不能至高郵耳此說甚似其實非也案禹貢淮水出桐柏會泗汴以入于海故以小江而列於四瀆正以其能專達于海耳若如此說則禹貢當云南入于江不應言東入于海而淮亦不得為瀆矣且翱沿汴二字似亦未當蓋古今往來淮南只行

邦溝運河皆築埭置閘儲閘潮沙以通漕運非流水也若使當時自有禹迹故道可通舟楫則不須更開運河矣故自淮至高郵不得為沿有高郵以入江不得為汴而颶又有自淮順潮入新浦之言則是入運河時偶隨淮潮而入有似於沿意其過高郵後又迎江潮而出故復有似於汴而察之不審致此謬誤今竟以是而說孟子是以誤而益誤也今案來南錄中無此語未詳其故近世又有立說以為淮泗本不入江當洪水橫流之時排退淮泗然後能決汝漢以入江此語尤巧而尤不通蓋汝水入淮泗水亦入淮三水合而為一若排退淮泗則汝水亦見排退而愈不得入江矣漢水自岷冢過襄陽南流至漢陽軍乃入于江淮自桐栢東流會汝水以入于海淮漢之間自有大山自唐鄧光黃以下至於潛霍地勢隔慕雖使淮泗橫流亦與江漢不相干涉不待排退二水而後漢得入江也大抵孟子之言只是行文之失無害於

義理不必曲為之  
說間費心力也

后稷教民稼穡樹藝五穀五穀熟而民人育人之有道  
也飽食煖衣逸居而無教則近於禽獸聖人有憂之使  
契為司徒教以人倫父子有親君臣有義夫婦有別長  
幼有序朋友有信放勳曰勞之來之匡之直之輔之翼  
之使自得之又從而振德之聖人之憂民如此而暇耕  
乎

契音薛別彼列反長放  
皆上聲勞來皆去聲

言水土平然後得以教稼穡衣食足然後得以施教

化后稷官名棄為之然言教民則亦非並耕矣樹亦種也藝殖也契亦舜臣名也司徒官名也人之有道言其皆有秉彝之性也然無教則亦放逸怠惰而失之故聖人設官而教以人倫亦因其固有者而道之

耳

真氏曰父子之親君臣之義夫婦之別長幼之序朋友之信皆人性所自有舜之命官敷教亦因其

有而導之耳非強之以所無也

書曰天叙五典勅我五典五惇哉此

之謂也

輔氏曰舉書曰以為證者天叙即所謂固有也勅而厚之即所謂道之也

放勳本

史臣贊堯之辭孟子因以為堯號也德猶惠也堯言



勞者勞之來者來之邪者正之枉者直之輔以立之翼以行之使自得其性矣又從而提撕警覺以加惠焉不使其放逸怠惰而或失之蓋命契之辭也

語錄曰問

振德是施惠否曰是然不是財惠之惠只是施之教化上文匡輔翼等事是也彼既自得之復從而教之○輔氏曰勞者勞之來者來之所以安其生也邪者正之枉者直之所以正其德也輔以立之翼以行之所以助其行也自得謂自得其性也振謂提撕警省也此乃大學新民之功也德謂加惠也此數句先儒註解皆只大綱提過都無意味至集註而後字字研究其理如此方見聖人之用又斷以為堯命契之辭始得允當

堯以不得舜為已憂舜以不得禹皋陶為已憂夫以百

畝之不易為已憂者農夫也

夫音扶  
易去聲

易治也堯舜之憂民非事事而憂之也急先務而已

所以憂民者其大如此則不惟不暇耕而亦不必耕

矣

輔氏曰舉農者之所憂以並堯舜之憂見其小  
大廣狹之不倫則不暇耕與不必耕者可知矣

分人以財謂之惠教人以善謂之忠為天下得人者謂

之仁是故以天下與人易為天下得人難

為易並  
去聲

分人以財小惠而已教人以善雖有愛民之實然其

所及亦有限而難久

輔氏曰以已之善而教人使民皆為善則是有愛民之實矣然

其所及亦止於吾力之所能與吾身之所及而已故有限而難久也惟若堯之得舜舜

之得禹皋陶乃所謂為天下得人者而其恩惠廣大

教化無窮矣此其所以為仁也

輔氏曰堯之得舜舜之得禹皋陶則能廣

吾力之所能而俾恩惠極於廣大繼吾身之所

有而俾教化推於無窮矣然後可以謂之仁

孔子曰大哉堯之為君惟天為大惟堯則之蕩蕩乎民

無能名焉君哉舜也巍巍乎有天下而不與焉堯舜之

治天下豈無所用其心哉亦不用於耕耳

與去聲

則法也蕩蕩廣大之貌君哉言盡君道也巍巍高大之貌不與猶言不相關言其不以位為樂也

吾聞用夏變夷者未聞變於夷者也陳良楚產也悅周公仲尼之道北學於中國北方之學者未能或之先也彼所謂豪傑之士也子之兄弟事之數十年師死而遂倍之

此以下責陳相倍師而學許行也夏諸夏禮義之教也變夷變化蠻夷之人也變於夷反見變化於蠻夷

之人也產生也陳良生於楚在中國之南故北遊而  
學於中國也先過也豪傑才德出衆之稱言其能自  
拔於流俗也倍與背同言陳良用夏變夷陳相變於  
夷也輔氏曰陳良楚人而北學於中國則是用夏變  
夷陳相素學於陳良乃為許行所變則是變於  
也

昔者孔子沒三年之外門人治任將歸入揖於子貢相  
嚮而哭皆失聲然後歸子貢反築室於場獨居三年然  
後歸他日子夏子張子游以有若似聖人欲以所事孔

子事之彊曾子曾子曰不可江漢以濯之秋陽以暴之

皤皤乎不可尚已

任平聲彊上聲暴蒲木反皤音杲

三年古者為師心喪三年若喪父而無服也任擔也

場冢上之壇場也

愚案皇覽云孔子冢前有以銳甕為祠壇方六尺

有若似聖

人蓋其言行氣象有似之者如檀弓所記子游謂有

若之言似夫子之類是也所事孔子所以事夫子之

禮也江漢水多言濯之潔也秋日燥烈言暴之乾也

皤皤潔白貌尚加也言夫子道德明著光輝潔白非

有若所能彷彿也

輔氏曰此自是曾子見得如此他人不知其味也學者須是深思而

熟玩之直到曾子見處方知其味

或曰此三語者孟子贊美曾子之

辭也

今也南蠻馱舌之人非先王之道子倍子之師而學之

亦異於曾子矣

馱亦作鵠古役反

馱博勞也惡聲之鳥南蠻之聲似之指許行也

吾聞出於幽谷遷于喬木者未聞下喬木而入於幽谷

者

小雅伐木之詩云伐木丁丁鳥鳴嚶嚶出自幽谷遷

于喬木

詩傳曰丁丁伐木聲嚶嚶鳥聲之和也以伐木之丁丁與鳥鳴之嚶嚶幽深遷升喬高也

魯頌曰戎狄是膺荆舒是懲周公方且膺之子是之學

亦為不善變矣

魯頌閟宮之篇也膺擊也荆楚本號也

愚謂荆本州名春秋初以

州舉曰荆後乃曰楚

舒國名近楚者也

愚案春秋傳杜氏註舒國今廬江舒縣

懲

艾也案今此詩為僖公之頌而孟子以周公言之亦

斷章取義也



從許子之道則市賈不貳國中無偽雖使五尺之童適市莫之或欺布帛長短同則賈相若麻縷絲絮輕重同則賈相若五穀多寡同則賈相若屨大小同則賈相若

賈音價

下同

陳相又言許子之道如此蓋神農始為市井故許行

又託於神農而有是說也

輔氏曰下繫謂神農取噬噓之象日中為市交易而

退各得其所也

五尺之童言幼小無知也許行欲使市中所

粥之物皆不論精粗美惡但以長短輕重多寡大小

為價也

輔氏曰若不著得精粗好惡來說則無由說得通此義自孟子來無人看得出至集註而

後其義始明

曰夫物之不齊物之情也或相倍蓰或相什伯或相千萬子

比而同之是亂天下也巨屨小屨同賈人豈為之哉從許子

之道相率而為偽者也惡能治國家

夫音扶蓰音師又山綺反比必二反惡平聲

倍一倍也蓰五倍也什伯千萬皆倍數也比次也孟

子言物之不齊乃其自然之理其有精粗猶其有大

小也若大屨小屨同價則人豈肯為其大者哉今不

論精粗使之同價是使天下之人皆不肯為其精者而競為濫惡之物以相欺耳

○墨者夷之因徐辟而求見孟子孟子曰吾固願見今

吾尚病病愈我且往見夷子不來

辟音壁又音闢

墨者治墨翟之道者夷姓之名徐辟孟子弟子孟子

稱疾疑亦託辭以觀其意之誠否

輔氏曰初不言孟子有疾而忽言今

吾尚病病愈我且往見則孟子之意可見此亦所謂不屑之教誨也

他日又求見孟子孟子曰吾今則可以見矣不直則道

不見我且直之吾聞夷子墨者墨之治喪也以薄為其道也夷子思以易天下豈以為非是而不貴也然而夷子葬其親厚則是以所賤事親也

不見之見音現

又求見則其意已誠矣故因徐辟以質之如此

或問夷之

請見而孟子不許何也曰孟子雖以聞邪說為已任然不過講明其說傳之當世使聞者有以發寤於心而自得之耳固不輕接其人文口競辨以屈吾道之尊也譬如蠻夷寇賊之害聖人固欲去之然豈肯被甲執兵而親與之角哉

直盡言以相正也莊子曰墨子生不歌

死無服桐棺三寸而無槨是墨之治喪以薄為道也

易天下謂移易天下之風俗也夷子學於墨氏而不

從其教其心必有所不安者故孟子因以詰之輔氏曰先

儒皆以夷子葬其親厚則是以所賤事親也兩句為孟子設為此言以問夷子蓋於其事親至切處感發之今集註斷以為夷子實嘗厚葬其親不從墨子薄棺無槨之制者蓋墨子之說本是失於兼愛二本耳若薄葬則特其教中一事夷子雖受其教而至於葬親之時天理自然發動有不得如其師之說者故不用其制而凡事從厚也此於人情固宜有之故孟子因舉此一事以詰之而下文又專舉喪葬之說以發其意此政夷子之天理一點明處也

徐子以告夷子夷子曰儒者之道古之人若保赤子此



言何謂也之則以為愛無差等施由親始徐子以告孟子孟子曰夫夷子信以為人之親其兄之子為若親其鄰之赤子乎彼有取爾也赤子匍匐將入井非赤子之罪也且天之生物也使之一本而夷子二本故也

扶下音

同匍音蒲  
匍匐北反

若保赤子周書康誥篇文此儒者之言也夷子引之

蓋欲援儒而入於墨以拒孟子之非已

輔氏曰夷子蓋以儒者所

謂若保赤子一句有似於墨子愛無差等之說故舉之而問以此言何謂也是其意欲援儒以歸墨以拒

孟子之非已也。又曰：愛無差等，施由親始，則推墨而附於儒。

以釋已所以厚葬其親之意。

語錄曰：施由親始一句，乃是夷子臨時撰出來。

湊孟子意却不知愛無差等一句已自不是了。他所謂施由親始便是把愛無差等之心施之，然把愛入之心推來愛親是甚道理。輔氏曰：夷子蓋以墨子所謂愛無差等之說有似於儒者，若保赤子之言是欲彊推墨以附儒，又言施由親始謂愛無差等則皆當致厚，但其所施則當自親始以釋已之所以厚葬其親之意也。皆所謂遁辭也。輔氏曰：蓋孟子之問與說已不得故彊為此辭說以避免也。孟子言人之愛其兄子與鄰之子本

有差等書之取譬本為小民無知而犯法如赤子無

知而入井耳

輔氏曰彼有取爾也一句先儒說皆不明白今斷以為書之取譬方說得通云

若則是取譬也明矣蓋書之取譬本為小民無知而犯法正猶赤子無知而入井耳非謂愛凡人之赤子與兄弟之子一般也言兄弟之子而不言已子者蓋兄弟之子即與已之子無異也且人物之

生必各本於父母而無二乃自然之理若天使之然

也

輔氏曰此理乃自然而然故若天使之若此

故其愛由此立而推以及

人自有差等

輔氏曰書云立愛自親始蓋人之愛皆始於事親因事親以立其愛即所謂孝

弟為仁之本也然後推以及民及物自有等差輕重此仁義之道所以相為用也

今如夷子

之言則是視其父母本無異於路人但其施之之序



姑自此始耳非二本而何哉

或問此一節曰天之生物有血氣者本於父母

無血氣者本於根莖皆出於一而無二者也惟其本出於一故其愛亦主於一焉蓋一體而分血氣連屬者戀之情自不能已固非他人之可比也自是之外則因其分之親疎遠近而所以為愛者有差焉此儒者之道所以親親仁民以至於愛物而無不各得其所也今夷之乃謂愛無差等則是不知此身之所從出而視其父母無以異於路人也雖其施之先後稍不悖於正理然於親而謂之施焉則亦不知愛之所由立矣是非二本而何哉。語錄曰人多疑其知所先後而不知此正是夷子錯處人之有愛本由親立推而及物自有等級今夷子先以愛為無差等而施之則由親始此夷子所以二本夷子但以此解厚葬其親之一言而不知愛無差等為二本也。又曰既是一本其中便自然有許多差等等若二本則二者並

立無差等矣。又曰愛有差等此所謂一本蓋親親仁民愛物具有本末也愛無差等何止二本蓋千萬本也。又曰事他人之親如已之親則

是兩箇一樣重了如一木有兩根也

然其於先後之

間猶知所擇則又其本心之明有終不得而息者此

其所以卒能受命而自覺其非也

輔氏曰此段言夷子雖陷於墨子之

敬而其天理一點之明終有不可息滅者此蓋秉彝之心也故其先親後疎之際猶知有所擇而不至妄行錯施故孟子之言得以因其明而入之夷子亦得因其明而受之也

蓋上世嘗有不葬其親者其親死則舉而委之於壑他日過之狐狸食之蠅蚋姑嘬之其額有泚睨而不視夫

泚也非為人泚中心達於面目蓋歸反藁裡而掩之掩

之誠是也則孝子仁人之掩其親亦必有道矣

蚋音洩  
嘬楚怪

反泚七禮反晚音諧為去  
聲藁力追反裡力知反

因夷子厚葬其親而言此以深明一本之意

輔氏曰  
此又孟

子略其適辭而專以其良心之發有不容已處深明  
夫人惟一本故其於親之喪哀痛迫切非他人之所  
可得者而因以見先王所制葬埋之禮必誠必信勿  
之有悔者固皆自然之理而墨子二本薄葬之說為  
杜撰妄作而不可行也 上世謂太古也委棄也壑山水所趨也

蚋蚊屬姑語助聲或曰螻蛄也嘬攢共食之也顙額

也泚泚然汗出之貌睨邪視也視正視也不能不視而又不忍正視哀痛迫切不能為心之甚也非為人泚言非為他人見之而然也所謂一本者於此見之尤為親切蓋惟至親故如此在他人則雖有不忍之心而其哀痛迫切不至若此之甚矣反覆也纍土籠也埋土舉也於是歸而掩覆其親之尸此葬埋之禮所由起也此掩其親者若所當然則孝子仁人所以掩其親者必有其道而不以薄為貴矣

徐子以告夷子夷子憮然為間曰命之矣

憮音武  
間如字

憮然茫然自失之貌為間者有頃之間也命猶教也

言孟子已教我矣

文集曰命之字作夷之名方  
成句法若作虛字則不成句法

蓋因其本心之明以攻其所學之蔽是以吾之言易

入而彼之惑易解也

輔氏曰此贊孟子之善於教人  
能因其明而入之得納約自牖

之義是以力不  
勞而功自倍也

孟子纂疏卷五

欽定四庫全書

孟子纂疏卷六

宋 趙順孫 撰

朱子集註

滕文公章句下

凡十章

陳代曰不見諸侯宜若小然今一見之大則以王小則  
以霸且志曰枉尺而直尋宜若可為也

王去聲

陳代孟子弟子也小謂小節也

輔氏曰謂自易於小節也此正對下文所

謂今一見之大則以王小則以霸而言之枉屈也直也言不見諸侯比小則以霸又為小也

伸也八尺曰尋枉尺直尋猶屈已一見諸侯而可以致王霸所屈者小所伸者大也

孟子曰昔齊景公田招虞人以旌不至將殺之志士不忘在溝壑勇士不忘喪其元孔子奚取焉取非其招不往也如不待其招而往何哉

喪去聲

田獵也虞人守苑囿之吏也招大夫以旌招虞人以皮冠元首也志士固窮常念死無棺槨棄溝壑而不



恨勇士輕生常念戰鬪而死喪其首而不顧也此二

句乃孔子歎美虞人之言

語錄曰非其氣不餒如何強得

夫虞人招

之不以其物尚守死而不往況君子豈可不待其招

而自往見之邪此以上告之以不可往見之意

輔氏曰讀

孟子須是就一章之中又斷置得如此分明方可玩索

且夫枉尺而直尋者以利言也如以利則枉尋直尺而

利亦可為與

夫音扶與平聲

此以下正其所稱枉尺直尋之非夫所謂枉小而所

仲者大則為之者計其利耳一有計利之心則雖枉

多伸少而有利亦將為之邪甚言其不可也

語錄曰天下事

不可顧利害凡人做事多要趨利避害不知纔有利必有害吾雖處得十分利有害隨在背後不如且在理上求之且如臨難致死義也若不明其理而顧利害則見危死事者反不如偷生苟免之人○輔氏曰人心不可二用喻於義則昧於利喻於利則昧於義天理也利私欲也天理有則而不流人欲橫流而不止夫人一有計利之心則惟利是務方其始也猶有枉小直大之辨浸浸不已殆其終也則併與小大皆不復計不至於滅天理而壞人紀不止也此孟子所以極其流而言之甚言其不可也

昔者趙簡子使王良與嬖奚乘終日而不獲一禽嬖奚

反命曰天下之賤工也或以告王良良曰請復之彊而後可一朝而獲十禽嬖奚反命曰天下之良工也簡子曰我使掌與女乘謂王良良不可曰吾為之範我馳驅終日不獲一為之詭遇一朝而獲十詩云不失其馳舍矢如破我不貫與小人乘請辭

乘去聲彊上聲女音汝汝為去聲舍上聲

趙簡子晉大夫趙鞅也王良善御者也嬖奚簡子幸臣與之乘為之御也復之再乘也彊而後可嬖奚不肯彊之而後肯也一朝自晨至食時也掌專主也範

法度也詭遇不正而與禽遇也言奚不善射以法馳驅則不獲廢法詭遇而後中也詩小雅車攻之篇言御者不失其馳驅之法而射者發矢皆中而力今嬖奚不能也貫習也

御者且羞與射者比比而得禽獸雖若丘陵弗為也如枉道而從彼何也且子過矣枉已者未有能直人者也

比比  
二反必

比阿黨也若丘陵言多也。或曰居今之世出處去

就不必一一中節欲其一一中節則道不得行矣楊氏曰何其不自重也枉已其能直人乎古之人寧道之不行而不輕其去就是以孔孟雖在春秋戰國之時而進必以正以至終不得行而死也使不卹其去就而可以行道孔孟當先為之矣孔孟豈不欲道之

行哉

輔氏曰楊氏只說何其不自重也一句便見得他是有諸已者凡人不知立已故不自重徇利

忘義枉已從人無所不至唯君子明道正義知所重在已故寧道之不行而不輕其去就也其以孔孟為言者欲學者知所法也欲道之行者仁也進必以正者義也仁義並行而不悖此其所以為聖賢也

○景春曰公孫衍張儀豈不誠大丈夫哉一怒而諸侯懼安居而天下熄

景春人姓名公孫衍張儀皆魏人怒則說諸侯使相

攻伐故諸侯懼也

輔氏曰儀衍二子皆破六國之從以為橫者也故或有觸其怒者則

用其險譎之術交關六國之君使相攻伐故諸侯懼也若安居不出則天下熄然無事也

孟子曰是焉得為大丈夫乎子未學禮乎丈夫之冠也

父命之女子之嫁也母命之往送之門戒之曰往之女

家必敬必戒無違夫子以順為正者妾婦之道也

焉於虔反

冠去聲女家  
之女音汝

加冠於首曰冠女家夫家也婦人內夫家以嫁為歸也夫子夫也女子從人以順為正道也蓋言二子阿

諛苟容竊取權勢乃妾婦順從之道耳

黃氏曰衍儀戰國之遊士

也一怒而諸侯懼安居而天下熄則其才亦有足稱者矣以其無學而不知道也一切求順於人孟子以妾婦目之況於學不及古人才不及衍儀哉夫順於人者人之所喜也不順於人者人之所惡也然順於人者非有他也以其威福之權足以生殺榮辱乎我也即是心而充之則貪得嗜利背君賣國者皆若人也豈但妾婦之可羞而已哉○輔氏曰二子之說諸侯亦非能彊其所不欲也不過阿諛苟容以逢其惡

而順其意耳是乃妾婦順從之道也婦人之事夫唯當以順為正其或夫有過失亦當委曲與順以開導之使得於義可也然亦或有彊矯其夫而得正者要之非常道非丈夫之事也

居天下之廣居立天下之正位行天下之大道得志與民由之不得志獨行其道富貴不能淫貧賤不能移威武不能屈此之謂大丈夫

廣居仁也正位禮也大道義也

語錄曰大槩只是無些子偏曲且如此心

廓然無一毫私意直與天地同量這箇便是居天下之廣居便是居仁到得自家立身更無些子不當於理這箇便是立天下之正位便是守禮及推而見於事更無些子不合於義這箇便是行天下之大道便



是由義

與民由之推其所得於人也獨行其道守其所

得於已也

輔氏曰與民由之則是推已之所得而與民共由之也獨行其道則是其道有不

推之於人故但守其道於一已而已守其道於已則雖不得志而其道未嘗不行於已也

淫蕩其

心也移變其節也屈挫其志也

愚謂富貴則求得欲從故多致蕩其心貧

賤則居約處困故多致變其節遇威武則又易致墮履震懼故多挫攝其志氣

○何叔京曰

戰國之時聖賢道否天下不復見其德業之盛但見

姦巧之徒得志橫行氣焰可畏遂以為大丈夫不知

由君子觀之是乃妾婦之道耳何足道哉

叔京名鎬昭武人○

輔氏曰他說得當時風俗人情出謂聖賢道否天下不見其德業之盛者尤好使聖賢之道得行而人道立天道成地道平萬物各得其所則斯民也當安然自適於泰和之域豈復以是區區者為奉哉既不復見聖賢之德業宜乎以是姦巧之人得行其志氣焰可畏之為大丈夫也孟子力辨而深詆之其所以正人心之功大矣

○周霄問曰古之君子仕乎孟子曰仕傳曰孔子三月無君則皇皇如也出疆必載質公明儀曰古之人三月

無君則弔

傳直戀反質與勢同下同

周霄魏人無君謂不得仕而事君也皇皇如有求而

弗得之意出疆謂失位而去國也質所執以見人者如士則執雉也出疆載之者將以見所適國之君而事之也

三月無君則弔不以急乎

周霄問也以已通太也後章放此

曰士之失位也猶諸侯之失國家也禮曰諸侯耕助以供粢盛夫人蠶繅以為衣服犧牲不成粢盛不潔衣服不備不敢以祭惟士無田則亦不祭牲殺器皿衣服不

備不敢以祭則不敢以宴亦不足弔乎

盛音成繅素刀反皿武永反

禮曰諸侯為籍百畝冕而青紘躬秉耒以耕而庶人助以終畝收而藏之御廩以供宗廟之粢盛使世婦蠶于公桑蠶室奉繭以示于君遂獻于夫人夫人副禕受之繅三盆手遂布于三宮世婦使繅以為黼黻文章而服以祀先王先公

輔氏曰此先王之制必如是然後能自盡其心至於

不得奉祭祀則士不容以自安而人亦以為弔焉古人之重祭祀也如此又曰士有田則

祭無田則薦黍稷曰粢在器曰盛牲殺牲必特殺也

皿所以覆器者

出疆必載質何也

周霄問也

曰士之仕也猶農夫之耕也農夫豈為出疆舍其耒耜

哉

為去聲  
舍上聲

曰晉國亦仕國也未嘗聞仕如此其急仕如

此其急也君子之難仕何也曰丈夫生而願為之有室  
女子生而願為之有家父母之心人皆有之不待父母  
之命媒妁之言鑽穴隙相窺踰牆相從則父母國人皆

賤之古之人未嘗不欲仕也又惡不由其道不由其道

而往者與鑽穴隙之類也

為去聲約音酌隙去逆反惡去聲

晉國解見首篇仕國謂君子游宦之國霄意以孟子

不見諸侯為難仕故先問古之君子仕否然後言此

以風切之也

輔氏曰周霄亦頗有策士之風但孟子據道之極不為其所動但直述其義理

以告之而已

男以女為室女以男為家約亦媒也言為父

母者非不願其男女之有室家而亦惡其不由道蓋

君子雖不潔身以亂倫而亦不徇利而忘義也

輔氏曰士

之仕猶男女之願有室家者此正理也至於為人男女而不待父母之命媒妁之言錯穴隙相窺踰牆相從則父母國人皆賤之為士而仕者不循天理之正不俟人君之招屈已以徇利枉道以求君則為聖賢之學者皆賤之直與兒子相窺相從者無異故君子之於仕未嘗潔身以亂倫而長往不顧亦未嘗徇利忘義而屈道以信身也

○彭更問曰後車數十乘從者數百人以傳食於諸侯不以泰乎孟子曰非其道則一簞食不可受於人如其

道則舜受堯之天下不以為泰子以為泰乎

更平聲乘從皆去聲

傳直戀反簞音丹食音嗣

彭更孟子弟子也泰侈也

曰否士無事而食不可也

言不以舜為泰但謂今之士無功而食人之食則不

可也

愚謂彭更之意不以舜為泰蓋以士之無事固不可虛食也

曰子不通功易事以羨補不足則農有餘粟女有餘布  
子如通之則梓匠輪輿皆得食於子於此有人焉入則  
孝出則悌守先王之道以待後之學者而不得食於子  
子何尊梓匠輪輿而輕為仁義者哉

羨延面反



通功易事謂通人之功而交易其事羨餘也有餘言  
無所貿易而積於無用也梓人匠人木工也輪人輿  
人車工也

曰梓匠輪輿其志將以求食也君子之為道也其志亦  
將以求食與曰子何以其志為哉其有功於子可食而  
食之矣且子食志乎食功乎曰食志

與平聲可食而食  
食志食功之食皆

音嗣  
下同

孟子言自我而言固不求食自彼而言凡有功者則

當食之

曰有人於此毀瓦畫墁其志將以求食也則子食之乎

曰否曰然則子非食志也食功也

墁武安反子食之食亦音嗣

墁牆壁之飾也毀瓦畫墁言無功而有害也既曰食

功則以士為無事而食者真尊梓匠輪輿而輕為仁

義者矣

輔氏曰彭更至此其辨已窮不復有說則既以為食功矣以為食功則以士為無事而食

者是真尊梓匠輪輿以為有事而可與之食輕為仁義者以為無事而不可與之食矣

○萬章問曰宋小國也今將行王政齊楚惡而伐之則

如之何惡去聲

萬章孟子弟子宋王偃嘗滅滕伐薛敗齊楚魏之兵欲霸天下疑即此時也

孟子曰湯居亳與葛為鄰葛伯放而不祀湯使人問之曰何為不祀曰無以供犧牲也湯使遺之牛羊葛伯食之又<sub>不</sub>以祀湯又使人問之曰何為不祀曰無以供粢盛也湯使亳衆往為之耕老弱饋食葛伯率其民要其有酒食黍稻者奪之不授者殺之有童子以黍肉餉殺

而奪之書曰葛伯仇餉此之謂也

遺唯季反威音成往為之為去聲饋食酒

食之食音嗣要平聲餉式亮反

葛國名

愚案葛國在梁國寧陵縣

伯爵也放而不祀放縱無道不

祀先祖也亳衆湯之民其民葛民也授與也餉亦饋也書商書仲虺之誥也仇餉言與餉者為仇也

為其殺是童子而征之四海之內皆曰非富天下也為

匹夫匹婦復讎也

為去聲

非富天下言湯之心非以天下為富而欲得之也

或問

湯為童子復讎而四海之內皆知其非富天下何也  
曰聖人之心廓然大公表裏洞達故一有所為則天  
下信之如雨暘寒暑  
無不感無不通也

湯始征自葛載十一征而無敵於天下東面而征西夷  
怨南面而征北狄怨曰奚為後我民之望之若大旱之  
望雨也歸市者弗止芸者不變誅其君弔其民如時雨  
降民大悅書曰徯我后后來其無罰

載亦始也十一征所征十一國也餘已見前篇

有攸不為臣東征綏厥士女匪厥玄黃紹我周王見休

惟臣附于大邑周其君子實玄黃于匪以迎其君子其  
小人簞食壺漿以迎其小人救民於水火之中取其殘

而已矣

食音嗣

案周書武成篇載武王之言孟子約其文如此然其  
辭特與今書文不類今姑依此文解之有所不為臣  
謂助紂為惡而不為周臣者匪與篚同玄黃幣也紂  
繼也猶言事也言其士女以匪盛玄黃之幣迎武王  
而事之也商人而曰我周王猶商書所謂我后也休

美也言武王能順天休命而事之者皆見休也臣附  
歸服也孟子又釋其意言商人聞周師之來各以其  
類相迎者以武王能救民於水火之中取其殘民者  
誅之而不為暴虐耳君子謂在位之人小人謂細民  
也

太誓曰我武惟揚侵于之疆則取于殘殺伐用張于湯  
有光

太誓周書也今書文亦小異言武王威武奮揚侵彼

紂之疆界取其殘賊而殺伐之功因以張大比於湯之伐桀又有光焉引此以證上文取其殘之義

不行王政云爾苟行王政四海之內皆舉首而望之欲以為君齊楚雖大何畏焉

宋實不能行王政後果為齊所滅王偃走死。尹氏曰為國者能自治而得民心則天下皆將歸往之恨其征伐之不早也尚何強國之足畏哉苟不自治而以強弱之勢言之是可畏而已矣

輔氏曰尹氏說盡後世為國而不自



彊但以彊大為畏者之病誠能反是道而求之於已則知仁者之果無敵而帝王之道是誠在我而已

○孟子謂戴不勝曰子欲子之王之善與我明告子有楚大夫於此欲其子之齊語也則使齊人傳諸使楚人傳諸曰使齊人傳之曰一齊人傳之衆楚人咻之雖日撻而求其齊也不可得了引而置之莊嶽之間數年雖日撻而求其楚亦不可得了

與平聲咻音休

戴不勝宋臣也齊語齊人語也傳教也咻謹也齊齊語也莊嶽齊街里名也楚楚語也此先設譬以曉之

也

子謂薛居州善士也使之居於王所在於王所者長幼卑尊皆非薛居州也王誰與為不善在王所者長幼卑尊皆非薛居州也王誰與為善一薛居州獨如宋王何

聲

居州亦宋人言小人衆而君子獨無以成正君之功

輔氏曰古之大臣欲正其君者豈特取辨於一人一已而已哉必也兼收並蓄旁求廣取使忠賢之士畢集于朝在君之左右前後者無非正人端士然後可以薰陶漸染以變化其氣質成就其德性是豈獨欲

趨事赴功而已哉置一小人於其間則便足以惑其  
君而敗其類況於長幼卑尊皆非君子而獨欲以一  
薛居州使王為  
善豈可得哉

○公孫丑問曰不見諸侯何義孟子曰古者不為臣不  
見

不為臣謂未仕於其國者也此不見諸侯之義也

段干木踰垣而辟之泄柳閉門而不內是皆已甚迫斯

可以見矣

辟去聲內  
與納同

段干木魏文侯時人泄柳魯繆公時人文侯繆公欲

見此二人而二人不肯見之蓋未為臣也已甚過甚

也迫謂求見之切也

輔氏曰士固當守義而不可輕往見君至於文侯繆公屈已求

見其意已切雖能聽用與否未可知聖賢於此則必見之矣至於踰垣閉戶則不成舉措亦為過甚而非

義矣

陽貨欲見孔子而惡無禮大夫有賜於士不得受於其家則往拜其門陽貨矚孔子之亡也而饋孔子蒸豚孔子亦矚其亡也而往拜之當是時陽貨先豈得不見欲

之見音現惡去聲矚音勸

此又引孔子之事以明可見之節也欲見孔子欲召  
孔子來見已也惡無禮畏人以已為無禮也受於其  
家對使人拜受於家也其門大夫之門也矚窺也陽  
貨於魯為大夫孔子為士故以此物及其不在而饋  
之欲其來拜而見之也先謂先來加禮也輔氏曰陽貨欲見孔  
子而惡無禮雖小人秉彛不可珍貨既先來加禮於已則已為得而不答之然貨之意則非誠矣故但往  
答其禮而不欲見其人是亦不屑之教誨也天地之施與萬物者豈有差忒哉

曾子曰脅肩諂笑病于夏畦子路曰未同而言觀其色

赧赧然非由之所知也由是觀之則君子之所養可知

已矣

脅虛業反  
赧奴簡反

脅肩竦體諂笑強笑皆小人側媚之態也

愚謂竦體者竦縮其

身強笑者  
強容而笑

病勞也夏畦夏月治畦之人也言為此者

其勞過於夏畦之人也

愚謂治畦  
灌園也

未同而言與人未

合而強與之言也赧赧慙而面赤之貌由子路名言

非已所知甚惡之之辭也孟子言由此二言觀之則

二子之所養可知必不肯不俟其禮之至而輒往見

之也

輔氏曰曾子厚重篤實故視小人側媚之態如病于夏畦之人而深憐之子路剛果勇決故以

未同而言赧赧其色者為非已所知而深惡之知猶不知況為之乎此子路守已之嚴而惡不仁之誠也

○二子所守如此雖各因其資質然亦是學力所就也○又曰言心聲也觀二子之言而知其所憐所惡者如此則二子所養決不肯枉道以徇人者可知矣○此章言聖人禮義之中

正過之者傷於迫切而不洪不及者淪於污賤而可

恥輔氏曰孔子之事禮義之中正也差以豪釐則失之矣于木泄柳則過乎禮義之中正矣故傷於迫

切而不洪曾子子路之所言則不及乎禮義之中正者故淪於污賤而可恥此君子之行已所以戰戰兢兢而唯恐有過不及之失也然與其污賤之可恥寧失於迫切而不洪段干泄柳猶為狷者也

○戴盈之曰什一去關市之征今茲未能請輕之以待  
來年然後已何如去上聲

盈之亦宋大夫也什一井田之法也關市之征商賈  
之稅也已止也

孟子曰今有人日攘其鄰之雞者或告之曰是非君子  
之道曰請損之月攘一雞以待來年然後已攘如羊反

攘物自來而取之也

輔氏曰因物自來而掩取之則非盜竊者之比若盜竊之為則

又大不可也損減也



如知其非義斯速已矣何待來年

知義理之不可而不能速改與月攘一雞何以異哉

輔氏曰天下事只有義利兩端纔出義便以利言也焉有兩存之理若知義理之不可而猶有吝惜之意不肯速改則亦終歸於悠悠必不能自拔而日新矣

○公都子曰外人皆稱夫子好辯敢問何也孟子曰子

豈好辯哉予不得已也

好去聲下同

天下之生久矣一治一

亂

治去聲

生謂生民也一治一亂氣化盛衰人事得失反覆相

尋理之常也

輔氏曰觀孟子說天下之生久矣一治一亂便見他胷中包括得宇宙過先言

氣化後言人事者氣化有盛衰然後人事有得失此理之常也然亦有氣化衰而人事之得可以轉移氣化而使之常盛者亦有氣化盛而人事之失有以戕敗氣化而使之遽衰者此理之變也蓋氣化無欲而有理故盛則必衰衰則必盛猶晝夜反覆之相尋人則有理有欲順乎理則事得從乎欲則事失其得失雖亦反覆相尋然人欲不行而唯理是順則其事常得而無失可併與氣化而轉移之若堯舜與賢之事是也若肆人欲以滅天理則雖氣化之盛亦可以戕賊之使遽衰三苗弗格于有虞之世三監弗靖於成周之時而漢唐之世一再傳之後遽有呂武之禍皆是也向非舜禹周公之聖及漢庭之賢佐有以平之則豈不至於衰敗乎集註

則但言其理之常者耳

當堯之時水逆行汜濫于中國蛇龍居之民無所定下  
者為巢上者為營窟書曰洚水警余洚水者洪水也

音洚

降又胡貢  
胡工二反

水逆行下流壅塞故水倒流而旁溢也下下地上高  
地也營窟穴處也書虞書大禹謨也洚水洚洞無涯

之水也警戒也此一亂也

輔氏曰此一亂  
純由乎氣化也

使禹治之禹掘地而注之海驅蛇龍而放之洧水由地  
中行江淮河漢是也險阻既遠鳥獸之害人者消然後

人得平土而居之

道側  
魚反

掘地掘去壅塞也道澤生草者也地中兩涯之間也

險阻謂水之汜濫也遠去也消除也此一治也

輔氏曰此

一治氣化人事相參者也夫人與鳥獸亦相為多寡蓋同稟於氣故也繁氣盛則正氣衰正氣多則繁氣

少聖人於其間有造化之用亦時焉而已

堯舜既沒聖人之道衰暴君代作壞宮室以為汙池民無所安息棄田以為園囿使民不得衣食邪說暴行又作園囿汙池沛澤多而禽獸至及紂之身天下又大亂

壞音怪行去聲  
下同沛滿內反

暴君謂夏太康孔甲履癸商武乙之類也宮室民居

也沛草木之所生也澤水所鍾也自堯舜沒至此治

亂非一及紂而又一大亂也

輔氏曰此一亂氣化人事相符者也自堯舜沒

其中夏太康孔甲履癸商武乙等暴君不一難以屢數至紂則大敗極亂而無以復加矣故直推至紂時言之想見夏桀之時亦未必有飛廉等惡人與夫虎豹犀象之害也

周公相武王誅紂伐奄三年討其君驅飛廉於海隅而戮之滅國者五十驅虎豹犀象而遠之天下大悅書曰

丕顯哉文王謨丕承哉武王烈佑啟我後人咸以正無

缺

相去聲  
奄平聲

奄東方之國助紂為虐者也

愚案奄國在  
淮夷之北

飛廉紂幸

臣也

愚案飛廉善走以材力事  
紂周武王伐紂并殺之

五十國皆紂黨虐民

者也書周書君牙之篇丕大也顯明也謨謀也承繼

也烈光也佑助也啟開也缺壞也此一治也

輔氏曰  
此一治

又氣化人事相參者也舉書之說者此言文王武王  
謀謨之大功業之光所以佑助開迪夫後人者莫非  
大正之道周全盡美而無有一豪壞缺之失也蓋正  
可為也無缺為難無缺謂禮樂刑政四達而不悖三

千三百之儀與至誠無倚之道並立而不偏凡所以正德利用厚生之具無一之不備防偽禁邪正慝之法無一之或廢夫然後可以為無缺至戰國時則道墜于地而無復有存者矣

世衰道微邪說暴行有作臣弑其君者有之子弑其父

者有之

有作之有讀為又古字通

此周室東遷之後又一亂也

輔氏曰此一亂又氣化人事相符者也前乎此

者雖曰世亂然但禽獸繁殖有以戕民之生而猶未至賊人之性至此以後則遂至傷壞人倫將使斯人盡為禽獸之歸其禍又慘矣此一亂又甚於前日是亦氣化人事之使然也

孔子懼作春秋春秋天子之事也是故孔子曰知我者

其惟春秋乎罪我者其惟春秋乎

胡氏曰仲尼作春秋以寓王法惇典庸禮命德討罪其大要皆天子之事也知孔子者謂此書之作遏人欲於橫流存天理於既滅為後世慮至深遠也罪孔子者以謂無其位而託二百四十二年南面之權使亂臣賊子禁其欲而不得肆則戚矣

胡氏名安國建安人。永嘉陳

氏曰此謂聖人以王法繩諸侯所褒所貶皆是奉行王法既空言以寓行事與天子無異此聖人大用非孟子不能知胡氏發明備矣

愚謂孔子作春秋以討亂賊則致治



之法垂於萬世是亦一治也

語錄曰問孔子作春秋特載之空言亂臣賊子

何緣使懼恐未足以為春秋之一治曰非說當時便一治只是存得箇治法使道理光明衆爛有能舉而行之為治不難當時史書掌於史官想人不得見及孔子取而筆削之而其義大明如今之史書直書其事善惡瞭然在目觀者知所懲勸故亂臣賊子有所懼而不敢犯爾。輔氏曰此一治又純乎人事者也雖氣化不應而不使夫子得位以撥亂而反之正然作春秋以討亂賊垂致治之法于萬世之下則其功又大於舜禹矣

聖王不作諸侯放恣處士橫議楊朱墨翟之言盈天下天下之言不歸楊則歸墨楊氏為我是無君也墨氏兼

愛是無父也無父無君是禽獸也公明儀曰庖有肥肉  
廐有肥馬民有飢色野有餓莩此率獸而食人也楊墨  
之道不息孔子之道不著是邪說誣民充塞仁義也仁  
義充塞則率獸食人人將相食

橫為皆去聲  
莩皮表反

楊朱但知愛身而不復知有致身之義故無君墨子  
愛無差等而視其至親無異衆人故無父無父無君  
則人道滅絕是亦禽獸而已公明儀之言義見首篇  
充塞仁義謂邪說徧滿妨於仁義也孟子引儀之言

以明楊墨道行則人皆無父無君以陷於禽獸而大亂將起是亦率獸食人而人又相食也此又一亂也

語錄曰楊墨只是差些子其末流遂至於無父無君蓋楊氏見世間人營營於名利埋沒其身而不自知故獨潔其身以自高如荷蕢接輿之徒是也然使人皆如此潔身而自高則天下事教誰理會此便是無君也墨氏見世間人自私自利不能及人故欲兼天下之人而盡愛之然不知或有一患難在君親則當先救之在他則後救之若君親與他人不分先後則是待君親猶他人也此便是無父此二者之所以為禽獸也。問率獸食人亦深究其弊而極言之非真有此事也曰不然即他之道便能如此楊氏是箇退步愛身不理會事底人墨氏兼愛又弄得沒合殺使天下偃偃然必至於大亂而後已非率獸食人而

何。輔氏曰此一亂又氣化人事相符者也。聖人之道非不愛身也。然有致身事君之義。有殺身成仁之時。故不至於無君。非不愛物也。然親親而仁民。民而愛物。有自然之序。故不至於無父。無君無父。則人道滅絕。又將視弑父與君而冥然不覺矣。是則人而反與禽獸無異也。故引公明儀之說。以言楊墨遂行。則人皆無父無君。安為亂賊。以陷於禽獸。而大亂將起。是以與公明儀所謂率獸食人。人將相食者類矣。楊墨之道不息。則邪說誣民。孔子之道不著。則充塞仁義也。此四句只是說天理人欲不並立而已。所謂邪說徧滿妨於仁義者。是解邪說誣民充塞仁義兩句也。以徧滿字解充字。以妨字解塞字。但不曾解誣民兩字耳。其實謂邪說誣罔天下之人。其勢至於充塞人心。罔有之仁義。使不能發也。夫仁義具於人心。而為邪說所誣。而充塞之使不得達於外。況能廣充之以全其量乎。嗚呼。人之始生也。既有氣稟之

拘其少長也又有物欲之蔽其既長也又有異端邪說之誣不有聖賢之裁左右扶翼之則幾何而能有世哉

吾為此懼閑先聖之道距楊墨放淫辭邪說者不得作  
作於其心害於其事作於其事害於其政聖人復起不

易吾言矣

為去聲復扶又反

閑衛也放驅而遠之也作起也事所行政大體也

氏真

曰事者政之目政者事之綱

孟子雖不得志於時然楊墨之害自

是滅息而君臣父子之道賴以不墜是亦一治也

輔氏

曰此一治又純乎人事也故氣化不應而孟子亦不得志於時然因其言而楊墨之說滅息君臣父子之道至今得以不墜此孟子之功所以不在禹下而亞於孔子也程子曰楊墨之害甚

於申韓佛氏之害甚於楊墨蓋楊氏為我疑於義墨氏兼愛疑於仁申韓則淺陋易見故孟子止闢楊墨為其惑世之甚也佛氏之言近理又非楊墨之比所

以為害尤甚

語錄曰問墨氏兼愛疑於仁此易見楊氏為我何以疑於義曰楊朱看來不似

義他全是老子之學只是箇逍遙物外僅足其身不屑世務之人只是他自愛其身界限齊整不相侵越微似義耳然終不似也。又曰楊墨只是硬恁地做佛氏最有精微動得人處本朝許多極好人無不陷

焉。○真氏曰：義者任理而無情。楊朱自一身之外，截然弗卹，故其迹似乎義。仁者尚恩而主愛，墨翟於親疎之間，無乎不愛，故其迹似乎仁。仁殊不知天下之理本一而分，則殊故。君子親親而仁民，仁民而愛物，心無不溥，而其施有序。心無不溥，則非為我矣。其施有序，則非兼愛矣。楊朱專於為我，則昧乎理之一。墨翟一於兼愛，則昧乎分之殊。若是而曰仁義，乃所以賊乎仁義也。

昔者禹抑洪水而天下平，周公兼夷狄，驅猛獸而百姓寧。孔子成春秋而亂臣賊子懼。

抑止也。兼并之也。總結上文也。

真氏曰：三聖事雖不同，而其揅天下之患。

立生民之極則一。

詩云戎狄是膺荆舒是懲則莫我敢承無父無君是周公所膺也

說見上篇承當也

我亦欲正人心息邪說距詖行放淫辭以承三聖者豈好辯哉予不得已也

行好皆去聲

詖淫解見前篇辭者說之詳也承繼也三聖禹周公孔子也蓋邪說橫流壞人心術甚於洪水猛獸之災慘於夷狄篡弑之禍故孟子深懼而力救之

輔氏曰洪水猛



獸害人之身夷狄篡弑賊人之性害人之身或專出於氣化故曰災賊人之性則實出於人為故曰禍然人而為夷狄之行篡弑之事者但自賊夫已之性耳至於邪說橫流不能救止則天下之心皆為之蠱壞將胥而為夷狄禽獸之歸矣此其所以為害愈慘宜乎孟子之深排力詆而不少置也

再言豈

好辯哉予不得已也所以深致意焉

輔氏曰重言此以深致其意者

欲人之察其心而知邪說之真可畏也

然非知道之君子孰能真知其

所以不得已之故哉

輔氏曰知道者備人物於一身通古今於一息故知邪說之言

特為深切而真有不得已而不救之者也學者苟能考三聖之心味孟子之說詳朱子之註則非徒能真知其所以不得已之故亦將併與斯道而得之矣人徒見孟子為一匹夫耳而不知其所憂者如是之大所

任者如是之重也且歷代聖人之所為皆不得已而為之者也得已則聖人將無所為矣豈獨孟子之辯哉

能言距楊墨者聖人之徒也

言苟有能為此距楊墨之說者則其所趨正矣雖未

必知道是亦聖人之徒也

輔氏曰謂自今以後不待有知道者真能息滅楊墨

之害然後可以繼聖人之事但能為說以距則是亦聖人之徒矣此可見孟子自任之重而望人之切也

○真氏曰所以勉天下學者皆以開異端扶孟子既正道為心庶幾生人之類不淪胥於禽獸也

答公都子之問而意有未盡故復言此蓋邪說害正

人人得而攻之不必聖賢如春秋之法亂臣賊子人

人得而討之不必士師也

輔氏曰此義自朱子發之若朱子則真可謂以是道

自任者故言此以詔天下使天下人人存是心則異端之說將無所容而聖人之道不復有蔽蝕之者矣

豈小補哉

聖人救世立法之意其切如此若以此意推之

則不能攻討而又唱為不必攻討之說者其為邪說

之徒亂賊之黨可知矣。尹氏曰學者於是非之原

豪釐有差則害流於生民禍及於後世故孟子辯邪說

如是之嚴而自以為承三聖之功也當是時方且以

好辯目之是以常人之心而度聖賢之心也

輔氏曰尹氏所

謂害流於生民禍及於後世者其亦真知孟子不得已之故矣

○匡章曰陳仲子豈不誠廉士哉居於陵三日不食耳

無聞目無見也井上有李螬食實者過半矣匍匐往將

食之三咽然後耳有聞目有見

於音烏下於陵同螬音曹咽音宴

匡章陳仲子皆齊人廉有分辨不苟取也於陵地名

螬螬螬蟲也匍匐言無力不能行也咽吞也

孟子曰於齊國之士吾必以仲子為巨擘焉雖然仲子

惡能廉充仲子之操則蚓而後可者也

孽薄厄反惡平聲蚓音引

巨擘大指也言齊人中有仲子如衆小指中有大指

也

輔氏曰齊俗奢侈放縱當戰國時士之傷廉者必多有之此匡章之所以推仲子之廉而孟子亦以

為齊人之巨擘也其語意與子誠齊人也者相似

充推而滿之也操所守也

蚓丘蚓也言仲子未得為廉也必若滿其所守之志則惟丘蚓之無求於世然後可以為廉耳

夫蚓上食槁壤下飲黃泉仲子所居之室伯夷之所築與抑亦盜跖之所築與所食之粟伯夷之所樹與抑亦

盜跖之所樹與是未可知也

夫音扶  
與平聲

槁壤乾土也黃泉濁水也抑發語辭也言蚓無求於人而自足而仲子未免居室食粟若所從來或有非義則是未能如蚓之廉也

曰是何傷哉彼身織屨妻辟纊以易之也

辟音璧  
纊音盧

辟績也纊練麻也

曰仲子齊之世家也兄戴蓋祿萬鍾以兄之祿為不義之祿而不食也以兄之室為不義之室而不居也辟兄

離母處於於陵他日歸則有饋其兄生鵝者已頻顙曰  
惡用是鰼鰼者為哉他日其母殺是鵝也與之食之其  
兄自外至曰是鰼鰼之肉也出而哇之  
蓋音閣辟音避  
頻與顙同顙與

鰼同子六反惡平聲  
鰼魚一反哇音蛙

世家世卿之家兄名戴食米於蓋其入萬鍾也歸自  
於陵歸也已仲子也鰼鰼鵝聲也頻顙而言以其兄  
受饋為不義也哇吐之也

以母則不食以妻則食之以兄之室則弗居以於陵則

居之是尚為能充其類也乎若仲子者蚓而後充其操者也

言仲子以母之食兄之室為不義而不食不居其操守如此至於妻所易之粟於陵所居之室既未必伯夷之所為則亦不義之類耳今仲子於此則不食不居於彼則食之居之豈為能充滿其操守之類者乎必其無求自足如丘蚓然乃為能滿其志而得為廉耳然豈人之所可為哉

輔氏曰以仲子之孤介自守足以高於一世之俗矣而孟



子所以力闢之者蓋世衰道微學者大抵因其資質之偏而固執一說力行以取名初不顧義理之如何如告子不得於言勿求於心以至許行陳仲子之徒皆是物也況如匡章者既已稱仲子為誠廉而傾向之矣此固以道自任者之所憂也則孟子烏得而不與之辯哉○又曰仲子之所守不必驗之他人也只自其身而推之則已有不能自滿其志者故孟子直以為蚓而後能充其操焉者斥之則仲子之行是豈人之所能為哉非人之所能為則是邪說詖行又豈可不深辯而力攻之邪○又曰聖賢之道充之則至於與天地同功仲子之道充之則范氏曰天之所生地之所養惟人為大人之所以為大者以其有人倫也仲子避兄離母無親戚君臣上下是無人倫也豈

有無人倫而可以為廉哉

輔氏曰人倫天彝也人唯

並立而為三此其所以為大也避兄離母則是無人倫矣雖有小廉僻行適足以夸於亂世而惑夫人心

也可不謹哉

可不畏哉

孟子纂疏卷六